

# **Epe-rupa Piru Redepo Yape-na Agaa Mana (Ol Provep)**

## **Ririna adaape aalu agaa**

Israel onaa nimu epe agaa-para epe kone saape kone madaa ranaame omoa go agaa ora epeta kone isimi. Gore mo Israel supara piri makuae aanumi penaa aa ogegeaa ona inumakuanu mogeasimi.

Gore ora epe-rupa piru redepo yape-na rere mogo (tisa) mogeaae aanumi nimu agaa mana waru tema rabu epealia kone isimi. Go buk-na remaame ta-rupare epe kone akepu yapalo aba rumaa adamina. Goa puare epe-rupa pirapena re page Adaa Aa maada kone rulaawa epe-rupa piru redepo yape page go agaame agu mada lagialia.

Go buku madaare niaana onaa nogo naaki, niaana ruru-nu raapu page epe-rupa pirape-rupa wata. Epe agaa adaapu iare gore kogonopu ruru rado onaa raapu page epe-rupa pi-rape kone meaa watea. Gore ona inumakua aa ogegeaa rabameape agaa iyare agaa narasu paake pupitagi nanoa epe kone ratua pirape kone luabu iya. Goa puaare niaana bipa niaana bi rabuaniaawa onaa naara pimi-nu rabamua epeanu pamina.

Agaa to medaloma madaare Gote-na pora medaloma mea wata. Gore medalomare mo makuae aanu niaa epe-rupa piramonalo niaa

mana lagi agaa iya. Goa puare agaa rayo go buku madaa tu sua niaa lageme.

*Robo (1-9)*

*Epe redepone koneme niaa rabamua epe-rupa mapopaaya.*

*Go Buk-mi onaa rado rado adaapu rabamealia.*

<sup>1</sup> Go buk madaare Devit-na si Israel onaana aa mudu king Solomon-me go epe agaa tu isa. Goa pua onaa epe-rupa pirinalo tu isa. <sup>2</sup> Go Epe agaa-me niaa epe kone gua niaa maredepo yalia. Go agaa rayo waru adalima rabu niaa epe kone sua epe pora ratape-rupa mogealia. <sup>3</sup> Go buk madaa iya agaa pagoa adoa ratalima rabu onaa rayome peme-rupa epe kone mua ratalima. <sup>4</sup> Go yapare aa medaloma kone rudu yalia rabu go buku madaa kone mua nimu epe kone mada mealimi. Goa pua ogegeaa medaloma epe kone mealimi-pulu epe pora mada pamualimi. <sup>5-6</sup> Go buk madaare aa medalomame epe kone ratinalo makuae yae mogealia-pulu epe-rupa makuaalimi. Go buk-miri niaa saa agaa page, mada-mi agaa page paga-i agaa page lagialia rabu makuae aanu-na epe pora adoa makuaalima.

<sup>7</sup> Go yapare neme epe makuae yae meda mulalo paliri neme Adaa Aa madaa kone aba rulape. Aa medaloma epe kone naimiri nimu epe makuae yae meape gimeme.

*Ogegeaanu mogeape agaa mana*

<sup>8</sup> Nogo naaki nimimi-ri nimina ama aapa laapon-a agaa waru pagoa ratalepape. <sup>9</sup> Nimuna

agaame ne epe aa ma-aulalia. Gore epe raguna adipemedede-rupa mada adipali.

<sup>10</sup> Nogo naaki-nu paake pupitagi ne aanumi nimi omeme pua wae-para mea palimi waru adalepape. <sup>11</sup> Go piaene wae aanumi gupa teme: Go naaki ne aipapulu ipu. Abia niaame aa meda tamina. Niaame pora-nini suruboa aanu medaloma tu-maomamina. Nimu epe aanu epalimi page, pina pa tu maomamina. Gore niaana kone-me niminaalima yae rayo pa pamina. <sup>12</sup> Niaame nimu ora aipapulu tu-maomawa. Onaa omeme robona tu maomaina. Goa palima rabu mo onaa rogaaeme tapa-para rogaaemerupa pamina teme. <sup>13</sup> Go aanuna oyae luabu muare niana ada rubitabena samina. <sup>14</sup> Ne niaa raapu goanu pamina lo epaliri oyaenu adaapu mua nena ada-para rubina saina teme. <sup>15</sup> Go naaki pupitagi ne aanumi ne-para goa temere, nimuna agaa napage gimape. Nimuna go waea kone naratamea pope. <sup>16</sup> Aanuri nimu waeagu peme. Goa pua oroyalo nimumi pa onaanu agu tu-rubebe pape kone imi. <sup>17-18</sup> Onaame oroyalo pupitagi noalimiru nimu wae yoto mealimi. Gore yapa lokeme nipuna maa-para ope pogamarayade-rupa nimuna bipa ope neme. Yaanuri ini rua, poga imi rabu adoa nimu mo poga mada naroaeme. <sup>19</sup> Go yapare mo pupitagi neme aanumiri, go kone na-i ope nape kone sua pupitagi pa noaeme. Gore nimu paake meme oyaenumi, nimu ma-oyatalia.

*Onaame epe pora naratalimiri kedaa adaapu*

*mealimi.*

<sup>20</sup> Epe konena porare ona meda-me pora-nini aawa page maket-nini aawa page onaa yaloaaya-rupare epe kone go-rupa epea. <sup>21</sup> Nipu adaa ada kagurena pora kerepo-para aawa page onaa adaapu kiritae-pare awa page yaloa agaa ta-rupa mada pea.

<sup>22</sup> Nimi kone rudu ta onaa page, oroyalo gupa agu mada piralimi ya? Nimi maeyae onaanumi epe kone namealimiri pa ero agaa agu teme. Arabu nimimi go wae kone gimalimi ya?

<sup>23</sup> Nimina wae yaenu gimaliminalo neme agaa puri pane lagialo. Naa agaa pagalimiri neme epe kone epe pora watoa rabu nimi epealimi.

<sup>24</sup> Neme ni piri ipulupa loa yaato pare nimimi oroyalo gimoa naepeme. <sup>25</sup> Nimimi na epe agaa pagoa nina kone ratalepa to pare agaa rasua epe agaa gimeme.

<sup>26</sup> Go peapulu kedaa adaa medaa nimi madaa epaliare neme page nimimi pemerupa adoa gimalua. Nimi wae-rupa piralimi page neme giri laawa gimalua. <sup>27</sup> Nimi madaare kedaa adaa poripu puri pane epeade-rupa epalia. Kedaa page radaa pi yaenu epalia raburi adaa poripu magomawae-rupa epalia-ga adalima.

<sup>28</sup> Kedaa epalia raburi ni ipu loa yateme pare ni mada naepalu. Goa pua nimimi ni asapu piralimi pare nimimi ni mada na-adalimi. <sup>29</sup> Nimimi Adaa Aa-na epe kone rolo-para pirape gimeme-pulu nimi gimalua. <sup>30</sup> Nimi naa epe agaa rasua neme nimi ma-redepo yatalo-pe rabu agaa rasua gimeme. <sup>31</sup> Goa pea-pulu abiare nimina peme

waea luabuna yotore nimina bipa mada mealimina. <sup>32</sup> Epe kone na-imि onaame ni maasa rilaeme. Goa peme-pulu nimu alupalimi. Goa pua nimuna bipa maeyaawa waea rayo nimumi makuaema kone imi. Go koneme nimuna bipa oyalimi. <sup>33</sup> Go yapare onaa medaloma naa agaa pagoa ratalimiri nimu epe-rupa piralimi. Goa palimiri nimu madaa wae kedaa epalia rabu nimu epe-rupa pirua mogo wae yaenu madaa na-adalimi.

## 2

### *Epe Pora Rateme Onaa Epe-rupa Piralimi*

#### *Robo 2*

<sup>1</sup> Nogo naakinu nimimi naa agaa waru pago ratua, nimina kone-para waru niminaatepape. <sup>2</sup> Epe makuae-yaе waru mua teme agaa rayo waru ratua epe naaki nogo mada piralimina. <sup>3</sup> Epe konena agaa ne madaa epena go agaa meape. Gore onaa yateme rabu pimide rupa mada piralimina. <sup>4</sup> Aa medame kalai-pu kogono pua no su runane pagaa i gol aana mulalo kogono radaa pina pea-rupa epe kone mulalo-re radaa pina kogono go-rupa pape. <sup>5</sup> Neme goa rayo palidare neme Adaa Aa-na kone rayo mada adasali. Goa paliri neme Gote page nipu kone waru ru-laaye.

<sup>6</sup> Gore akolo ya? Aa adaa nipuri ora oyae rayona re yade. Nipumi epe kone gua makuae yae page oyae rayo nipumi niaa guaaya. <sup>7</sup> Adaa Aa nipuna agaa pagoa rateme onaanuri wae yae epe yaenu page adoa rumae. Goa peme-pulu Adaa Aa-me nimu waru suruboa wae-para nalopena

epe-rupa pirina tea. <sup>8</sup> Gote-me nipuna agaa pogoa rateme onaanuri nipuna surube kuta runane mapiraaya. <sup>9</sup> Nogo naaki nimi epe kone adoa ratalimi-dare epe pora luabu adoa pamualimi. Epe agaa rateme aanu medaloma page epe kone rumaaawa epe pora mada mea watea.

<sup>10</sup> Goa pua epe kone adaapu nena robaa-para rubialia rabu raana-me omali. <sup>11</sup> Epe kone ratali raburi epea luabumi ne raana gua ne madaa rubia kuma gialia. <sup>12</sup> Goa pua waea peme aanu-para agaa wae-rupa teme aa-nu raapu medaa-para napirape. <sup>13</sup> Go aanu nimu epe pora gimoa wae ribaane pora ratua waea puaeme. <sup>14</sup> Gore nimu wae pora ratulalo pedo pu rana omoaeme. <sup>15</sup> Go aanuna konere pugu pua bebolo maeya tea.

<sup>16</sup> Gore aa medana oreme omeme pua paake nape kone salia-dare epe kone aba go agaa-para epalia. Goa palia raburi neme mogo onana kone adoa mada gimali. <sup>17</sup> Go piaene onamere abade ona inumakua pirua aani raapu ki mua pirisipide-agaa gimoa waea pape kone mualia. Gore Gote-na ini agaa madaa ora lalo loa misipide agaa page gimea. <sup>18</sup> Go rabu neme go ona rata mea pali-daare neme aba ome onaa ratamea pe. <sup>19</sup> Go ona adola peme aanu nimu oro yalo eperupa pirape pora gimoa wae pora ratulalo peme-pulu epe pora narateme.

<sup>20</sup> Epe pora ratamea pope kone salidare neme epe pora ratua mada niminaali. <sup>21</sup> Epe aanuri go su-ama oro yalo epe pora ratua pa piralimi. <sup>22</sup> Go

yapare Gote-me waea pi aanu nimu ratu talia.  
Gore onaame nimuna maapu-para etaa wae mea  
rasu rubeme-rupa nimu mea rasu rubalia.

### 3

#### *Epe Koneme ne epe-rupa pirape yae mea watea.*

<sup>1</sup> Go naaki neme ne agaa mana lagialo-ga waru pagape. Kone narugulape pare oro yalo neme go agaa waru pagoa ratape.

<sup>2</sup> Neme go agaa mana pagoa ratali raburi ne go suamaa oro yalo eperupa pirali. Goa pua ne redepone porana aawali. <sup>3</sup> Neme aa meda raapu adapua aawape page aa meda lorobaa kalape kone page waru sua aape. Go agaa luabu nena kone-para mea sua nena maa-para epe kulubu oyae ma-imi-rupa madaa masaaape. <sup>4</sup> Neme goa pali-daare onaa luabumi ne raana omoa nena palide kogono epeta teme. Goa palimi rabu Gote-me page ne raaname omalia.

<sup>5</sup> Neme Aapa Gote madaa kone ora waru rulaawa eperupa piraina. Neme nina bipa makuae yae madaa epe-rupa aalua kone nasape. <sup>6</sup> Neme oyae luabu pulalo paliri Adaa Aa madaa kone aba rulaawa pape. Go rabu nipumi ne epe redepone pora mea watea.

<sup>7</sup> Neme nina makuae yaere ora warua-da pe kone nasape. Neme Adaa Aa madaa kone rulaawa nipuna rolo-para pirua waea napape. <sup>8</sup> Neme goa pali-daare ora epealia. Neme yaina omoa marasini nemedi rabu to yogaene raba

mealade-rupa mada go epe pora ratali rabu ne epe-rupa mada aali.

<sup>9</sup> Nena maapu-para eta meda napeyoa poralia raburi mua Adaa Aa nипу re-para orapi-lo kalape. Goa pali-daare go madaa Adaa Aa nипу adaa bi mada mealia. <sup>10</sup> Orapi-loa pa kate rabu Adaa Aa-me nena maapu-parà eta nape yae ora waru ma-opaalicia. Goa pua nena ada-para eta oyae luabu rulatabalia. Goa pua nena waini-pe page rubia koya-pape palia.

<sup>11</sup> Go naaki, Adaa Aa-me ne raba mulalo oyae meda palia-dare, neme ratu nayawe nena lorobaa maepeape.

<sup>12</sup> Gore akoloya? Adaa Aa nипуми raaname omea onaa-re maredepo yaaya. Niaana aapanumi nimuna nogo naakinu kone rulaawa suruboa maredepo yaeme-rupa mada pea.

<sup>13</sup> Aa medame go epe kone-para makuae yae lapo mealia-daare nипу pedo pinawa. <sup>14</sup> Gore akolo ya? Ora epede silva gol page epe kone-me rabuniaaya. <sup>15</sup> Mone yoto adaa pea aana gol page, pa oyae medaloma neme ora epeta kone sua raaname ome yaenu page rabuniaaya.

<sup>16</sup> Epe kone agu suali-dare ne epe kone oro yalo sua oyae page adaapu sua go su-amaa adaalu-pu mada piruaawa onaanumi nena bi minasaalimi.

<sup>17</sup> Epe koneme nena pu robaa-para raana waru gua go su-amaa adaalu-pu pirape yae page ora ma-epeaalia. <sup>18</sup> Epe koneme-re onaa epe-rupa piraama pope kone mea gialia. Gore oro-yalo

kagaa piraama laama popena paa kato nona  
piane repena-rupa aalimi.

<sup>19-20</sup> Adaa Aa nipuna epe kone sua go su-yaay  
laapo ripima warisa. Nipumi su-para ipa raku-  
inaloa moae kobere yaa madaa masaawa yai  
malopaaya.

<sup>21</sup> Naa si neme gimali-ga waru adoa epe kone-  
para makua yae lapo waru irulu saabape. <sup>22</sup> Goa  
pea epe kone-para epe makuae yae laapomere  
ne oro yalo piraama laama pope kone gua epe  
pepena-rupa pua aawali. <sup>23</sup> Goa pua ne epe  
pora pamuali rabu oyae medame nena àà mada  
na-aawalia. <sup>24</sup> Ne u-patulalo pali rabu ne oyae  
meda pala na-omali. <sup>25-26</sup> Gore neme Adaa Aa  
madaa kone waru puri paboa rulali-dare iaan-  
numi ne tulalo yada salimi page nimuna agona-  
para ne mada na-odobali. Wae yapi-di meda  
waea palimide aanu madaa opopalia rabu ne  
napogola sali. Go piaene yapi-di nimu madaa yai-  
poripu laapo epea-rupa mada epea.

<sup>27</sup> Aa meda oyae rudu yaliada agaa mealiare  
oyae adaapu saina kalape. Dia yaliare nakalape.  
<sup>28</sup> Nena adami aame oyae agaa mealia rabu kat-  
alo paliri, pa ogesi-da puua adoaa nalape. Ekera  
wala epali rabu gialua-ga lo gorupa nalape.

<sup>29</sup> Nena adami aanu ne raapu re-para pimiri,  
ne nimuna adami aa kone imi-ga nimuna kone  
nama-oyaape. <sup>30</sup> Aa medame ne-para waea

napalia-dare go aa nипу raapu yada-yada napi-pape.

<sup>31</sup> Nena kone mo yada pi aanuna pea-rupa maeyaawa nimumi go peme-a luabu naratape. Goa pua nimumi pamualimi pora rayo gimate. <sup>32</sup> Adaa Aa-me wae kone imi aanuri gimea-daa lalo. Goa pea pare Adaa Aa nipumi epe pora ratua epe kone imi aanu page nipuna epe purobaa kata. Goa pua nimu waru surubea.

<sup>33</sup> Adaa Aa-me gupa ta: waea peme aanu luabu nimuri, nimuna ona nogo naaki luabu raapu alupalimi ta. Go yapare Adaa Aa-me epe redepone onaare nipuna ona nogo naaki oyae luabu eperupa suruboa raba mealia rabu epe-rupa piralimi ta. <sup>34</sup> Aa medame aa yagonu-para ero agaa temedaare, Gote-me go aa nипу page ero agaa tea. Pare aanu medaloma epe kone-sua ae aanuri Gote-me nipuna epe kone luabu abutea. <sup>35</sup> Epe kone imi aanu-ri onaa luabumi epe bi kateme. Go yapare kone wae-imि aanuri nimuna bipa nimuna bi moyatalo peme.

## 4

*Nimimi epe kone-para makueyae lapo mealepape*

<sup>1</sup> Go nogo naaki nimimi nina agaa waru pagalepa. Ni nimina aapa-ga, nimimi ni madaa epe kone mealepape. <sup>2</sup> Agaa neme go lagialo-re epeta-ga, nimimi narubalepape. Pa yae kone sua rubalimi raburi nimi omalimi.

<sup>3</sup> Nina amame naaki meda abi namadini ni komea madu isa-pulu, nipumi ni madaa raana omea. <sup>4</sup> Gore ni oge naaki pirano aapa nipumi ni agaa mana gupa lagisa. Nina agaa nena kone-para waru mea sua go agaa ratape sa. Goa pali rabu ne ora epe-rupa piru diayali sa. <sup>5</sup> Neme epe kone mua kone-para mea rubina lape. Neme naa agaa mea rubebe pua kone narugulape. <sup>6</sup> Dia neme epe kone nagimape. Go agaame ne epe-rupa surubalia rabu ne ora epe aa pirali. <sup>7</sup> Gore neme aba ripia mealiare epe kone ora riri-nane meape. Neme oyae medaloma meaayo kone saliri epe yaere epe kone yade. <sup>8</sup> Neme epe kone raaname omoa irulu sabaali raburi, go epe kone-me ne adaa bi gialia. Go rabu ne ora epe aa pirali. <sup>9</sup> Goa pua nena aalu mada king aa mudu medana raguna nona piene adipua aali.

### *Pora laapo ia*

<sup>10</sup> Go naaki neme nina agaa pagoa ratali rabu ne go su-amaa oro yalo adaalu-pu piruali.

<sup>11</sup> Neme ne epe pora mea waloa epe poranini painalo maredepo yaayo. <sup>12</sup> Gore ne go pora ratua paali rabu oyae medame mada nama-oyaalia. <sup>13</sup> Ne oroyalo pirama lama pope agaa-re, nina agaa ya-pulu ratali rabu go-para ia agaame ne waru surubalia.

<sup>14</sup> Neme wae aanuna agaa gimoa nimuna pulalo palimide-anu page gimape. <sup>15</sup> Neme go pora gimoa pogola pua su-adaalu meda-nane pope. <sup>16</sup> Gore mo waea puaeme aanumi waea meda napalimiri, nimu u-mada napatalimi. Ni-mumi waea palimi-daare, nimu u mada patalimi.

**17** Wae kone-para wae pora ratua aa yagonu mayapere pupitagi ne aanu nimuna eta-ne yae-rupa noaème.

**18-19** Wae aa luabu nimuna ini-para ribaa waru ta-pulu, nimuna àà koyatimi awolalo palia page mada na-adalimi. Go yapare epe-rupa redepoya piri aanuna porare nimu naare yapi-pu roa paa putalade nona piane-pare piralimi.

**20** Go naaki nina agaa nena aane-para penaloa waru pagape. **21** Neme go agaa puri paloa kone-para mea sua waru irulu makuabape. Go agaa kone rugulaliri ne oyali. **22** Neme naa agaa pagoa ratali rabu go agaame ne epe-rupa pirama pope pora mea gialia. Goa pua go agaa-me ne ora epe redepoya mapiraalia. **23** Epe koneme ne maredepo yatalo nena kone-para epaliare, ipa naaku-para yokoa epeade-rupa epea. Oroyalo nena pora pamuape page nena kone wasupa luabu waru maredepo yaawa pamuape. **24** Neme yaa agaa na-lo wae yaenu page ora gimape. **25** Neme inimini na-pi mo ne palide pora waru adoa go pora ratape. **26** Nena kone ora epe-rupa redepo yaaina nena pora epe-rupa adoa ratua pamuape. **27** Neme mo epe pora pamuaaridere na-kone rugulape. Dia-ga ne popoke-nane puala wala koya-nane epala napape. Goa pua neme wae yae luabu gimapena pora adoa ratape.

## 5

*Neme aa medana ore nayolape*

<sup>1</sup> Naa si neme ne ora epe agaa gua ne makuae yaenu page gua epe pora mea watalo pi. <sup>2</sup> Nena te agaa page epe-rupa te rabu nena te agaa luabu makuae aa-me ne nona-piane pagalimi. <sup>3</sup> Neme goa paliri akolo yapae? Ona medame aani gimoa ne ogeyaliari epe omeme pua rede-pi agaa medaloma lagialia-re nипу yolainalo goa palia. <sup>4</sup> Go rabu neme nipuna agaa pagoa nипу yotedaare orope go yaere wae yae yaana kone sali. Goa paliri etaame onaa imu apetabalade-rupa page wae rero pi marasini mea noa pirimi adalia. <sup>5</sup> Go piaene oname ne wae onaa omeme sunane mea palia. <sup>6</sup> Go pianе ona nипuri epe pirama-lama pope supara pope kone naniminaaya. Dia nипу go wae pora yade kone page na-ia. Nипу pa wae pora kuruape mada pamuaya. Goa pua nипу pa bebolaaya.

<sup>7</sup> Go naaki neme go agaa nagimi waru pagoa ratape. <sup>8</sup> Go pianе ona nипuna ada poragapepara page napе. Nипу pakeaawa ne yolamonea aape. Goa pua nипу ora gimapе. <sup>9</sup> Neme go onana kone adoa ratali raburi nena epe bi gimali. Nипу aanimi ne lo-robaa mada nagialia. Dia ne pena ogegeaa aina tumaomalia. <sup>10</sup> Ne epe-yae meda mealua loa kalai-pu kogono pu supiralide yae, wala aa medame nипу mealia. <sup>11</sup> Ne yaina adaa omoa uni kebo-agitua re loa adapara suaawa omali. <sup>12</sup> Go rabu neme gupa te: ni ora maeyaarude-ga akolo pawa pae te? Aa medalomame ni maredepo yaawa agaa wariaina lapede pawaaya te. <sup>13</sup> Neme nina mogeriae aanuna agaa rasua napagawa-rupa loali. <sup>14</sup> Abia

ni onaa luabuna ini agaa madaa oyoa yala polalo te.

<sup>15</sup> Nere nena ona raapu waru epe-rupa pirua pa aa medana ipa naaku-para napua nape. Goa pua nena ona raapu agu-patape. Aa meda nipuna ipa raana-para agu raapo nea-rupa nena agu raapo gupa nape. <sup>16</sup> Neme go onanu raapu nogo naakinu pa madua minarepali-dare, orope go nogo naakinumi ne mada naraba mealimi. Goa palimi-ga nena ona padaneme nena nogo naaki ora nena madu saina lapse. <sup>17</sup> Neme paake naaki madu rubebe pualiri oyalia. Goa pua nena nogo naaki luabu pa onaanu raapu bebolo pitimi.

<sup>18</sup> Nena ona-re nena ipa naaku rubita-rupa ya-pulu, Gote-me nena ona raaname omoa nipi raita epe agaa mana salia rabu epe-rupa pitipi. <sup>19</sup> Gore ora epe nape nanea ya-pulu oro yalo yalo ne rana gua nipuna epea luabu madaa ne ora raaname omalia. Goa pua rana waru omoa oro yalo nipuna adu mada page rana waru omape.

<sup>20</sup> Go naaki neme oro yalo kone adaapu sua aa medana ona paake yolape mada kone penaloa nipuna adu oraape madaa ali-ga waru adape.

<sup>21</sup> Adaa Aa-me niaame pema yae luabu page niaana ima kone luabu page aba adeaga makuaawa aape. <sup>22</sup> Aa nipuna pea wae pupitagi luabumi nipuna maa-para ope pogoa sua maraaya. Nipuna go pupitagi-mi nипу mea adia konaa mada roaawa wae-rupa omolalo pea.

<sup>23</sup> Go piaene aa nipuna bipa nipuna raana narabuaniaawa nipuna pea wae yaeme nипу adia

maeyane aa-rupa pia. Goa puaaya-pulu nipuna  
bipa go pea pupitagimi nипу tumaomalia.

## 6

### *Oyae medaloma gimaape kone*

<sup>1</sup> Go naaki aa medame pa aa medana rudu mua, nipuna bipa abula-peawi nasalia rabu neme na-abulaliri go kone epe-da dia. <sup>2</sup> Go koneme nena bipa ope poga sua nena maa-para ope aawa adibaya. Goa pea-pulu ne go rudu palia agaame ne adialia. <sup>3</sup> Go naaki ne wae yaeme adini rolo-para pirali-daare go wae yae luaburi abi gimate. Ne mogo wae aa-na pupitagi-na rolo-para napirape. Neme mogo rudu te agaa madaa yala poloa nagime. Ne pua mo palua te agaa lapaina yala napone abi pua agaa pua mupape. Goare ora aipapulu pape. <sup>4</sup> Ne u-ogeapu patu-piruae aipapu-loa abi pope. <sup>5</sup> Nena maa-para aba aaya ope poga aipapulu esepe rubape. Gore yaa-maitame nипу poga i-para pakeaawa naroaladerupa pakeape.

<sup>6</sup> Nimi ki-aa rakepea gi madini aanu nimiri neme agaa gupa lagialo. Nimi mo ini rubu-pi aame rakutanu-me pea aba adoa kone makuae aa-rupa piralepa.

<sup>7</sup> Rakutanu nimuna aa mudu page nimuna surube aa page meda napimi. <sup>8</sup> Go yapare nimuna eta adaapu suaaya raburi eta diayalia rabu mea nolalo pa mea krita suaeme.

<sup>9</sup> Goa peme-ga nimi ki-aa rakepene aanu nimiri pa u-patu pirape mada raana waru pea pae? Nimi

go ki-aa rakepene aanuri aa-rabu u rekataboa aalimi yapae? <sup>10</sup> Nimimi goa teme: niaa u ogesida pataluame pima pare wala ogesida kitu mua rekalima teme. <sup>11</sup> Nimimi goa palimi-daare nimina oyaenu aipapulu diyalia rabu aa naara piralimi. Paake ne aanumi nimina oyaee paake meme rabu diatade-rupa pa alia.

<sup>12</sup> Wae aanu nimimi yaa agaa ora waru temede. <sup>13</sup> Nimuna wae aa yagonumi adenalo gupa peme. Ne makirate rabu kimi page àà-me page inimi robo page sua nimuna waea pape agu mea wa-teme. <sup>14</sup> Oro yalo nimumi waea pape madaa kone rulaawa aanu medaloma kone wae ma-saaeme. <sup>15</sup> Goa peme raburi nimu kedaa adaa aipapulu meme rabu go kedaa wala ma-epeape-rupa kalai pua omalimi.

<sup>16</sup> Adaa Aa-me pupitagi ne kone ipa kerepopu (7) peme-a luabu madaa-re nipumi raana na-omea.

<sup>17-19</sup> Wae pupitagi ne-para aa yago meda adoa go aare pinawa kone imiapara, yaa agaa temena. Go page re-para aa yago meda renai madaa pama tumaomaeme. Nimumi waea pape madaa agu kone mapiraeme-para, waea pape-para pupitagi neme. Wae pupitagi pape madaa kone mapiraeme-para koso madaa yaa agaa adaapu teme. Go page nimuna amenu rapu agaa rado rado loa wae-kone masaeme.

*Aa medana ore nayolape*

<sup>20</sup> Go naaki neme nena ama aapa laapo-na agaa pagoa ratape. Nipumi tepe agaa narasalepape.

<sup>21</sup> Neme nipuna agaa kone-para mea sua oro yalo ratape. Go konere nena maa-para maasape kulubu-rupa masua pirali rabu ora epealia. <sup>22</sup> Ne pora pamulalo pali rabu go agaa-me epe pora mea watea. Ne u-patali rabu page go agaa-me ne surubalia. Ne u-patua rekali rabu page go agaame epe kone wasupa gua surubalia.

<sup>23</sup> Nena ama aapana agaare laba paame pora mea watade-rupa mada ne pora mea watea. Nena ama aapa lapome ne go agaa lagialipi rabu go su-amaa epe-rupa aawape pora mea watepe.

<sup>24</sup> Nipuna agaa-me ne rabamealipi rabu, ona wae-me ne kotulalo mada na-epalia. Aa medana oreme epe redepi agaa lagialia page napagape.

<sup>25</sup> Neme go onana epenape-nane to madaa epaame naomape. Go rabu nipumi paake nalipinalo ne adoba saliaga nipu aae repara napope.

<sup>26</sup> Gore aa medame paake aa rume ona raapu paake nalia-dare adaa yoto nakaloa pea. Gore pa oge etana yotosi peade-rupa mada kata. Gupa yapare aa medana ona raapu paake pupitagi no patalipi-daare adaa yoto waru rubalia. Goa pua nipuna bipa nipuna kone wasupa page tumaomalia.

<sup>27</sup> Gore neme repena egaa ako-para mea pagali raburi nena ma-raalide seti mada naralia ya?

<sup>28</sup> Go page repena egaa ralaina àà-me rabua talimi raburi nimina àà page mada naralia ya?

<sup>29</sup> Padane go-rupa aguri ne aa medana ore raapu paake pupitagi no patalipi-daare neme adaina kone ianu palimi.

<sup>30</sup> Gore aa medame page nипу reaeme omoa aa medanuna maапу paake-nea raburi, go maapure onaa-me go aa nипу abi natemedе. <sup>31</sup> Go yapare nimumi go paake-ne adasalimi rabu nипу koso laawa adialimi rabu oyae adaapumi abutea. Gore nипuna ada-para i oyae luabu ma-diayape-rupa madame abutea.

<sup>32</sup> Go yapare aa medame mo aa medana ore raapu patua nипуми paake yotea-dare go aa nипу waea adaape pea. Aa medame pupitagi nalia-dare nипuna bipa nипу ma-oyaaya. <sup>33</sup> Gore aan-umi nипу tua yala mapolaawa aape teme rabu oroyalo yala pola aalia. <sup>34</sup> Aa medame aa medana orenu raapu paake no pataliare onaa luabumi go aa ratu yawalimi. Go-rupa aguri mo aani nипуми go aa nипу radaa nena tua waea palia. Go aa nипу ogesi-da odome omape-re ora mada dia. <sup>35</sup> Goa pua rono lorenalo mone adaapu aani kate-pare mada namealia.

## 7

<sup>1</sup> Go naaki neme nina agaa waru pago ratua nena kone-para mea saape. <sup>2</sup> Nina agaa pagoa ratali rabu ne oroyalo epe-rupa mada piruali. Nina agaa-re nena ini surube-rupa waru surubape. <sup>3</sup> Nina agaa nena kone-para oroyalo waru inaloa aape. Oroyalo kiaalo nena-ki madaa mapiraae-rupa mada pirinalape. <sup>4</sup> Epe kone-para epe makuae yae lapo rata nena kone-para inaloa aape. Gore nena baani-para epe aa yago raapu aatede-rupa mada aape. <sup>5</sup> Aa medana ore-me ne ogeyoa nипу raapu paake napana tea raburi epe kone ne raapu oro yalo piralia-pulu ne goa mada

napali. Goa pea-pulu neme go onana agaa mada gimali.

*Aani piri ona medalomana waea*

<sup>6-7</sup> Yapi medame nina ada-para pirua widua-para ini penaato pare no pora-nini ogegeaanu pamuaeme. Gore nimu epe kone page makuae yae page yada ora na-i madaa pama pamuaeme. Goa peme pare aa padane-ma nipu ora maeyaaya. <sup>8</sup> Ogegeaa nipuri ona ora wae piri medana ada pera-pera pamea. <sup>9</sup> Gore naare pabola penaloa ribaa yolalo popea.

<sup>10</sup> Mo ona nipuri pora pami onanumi pemederupa pepena pua nipumi mo ogege aame adena kone ia. Goa pua mo-aa puua mada lamu mea. <sup>11</sup> Go onare nipu ora wae pupitagi ne ona yalo nipuna ada-para page epe-rupa napia. <sup>12</sup> Oro yalo nipu makete-nini page pora-nini pamualaina pua nipuna ada-para page epe-rupa napia. Aa agu asapala pirina pea. <sup>13</sup> Neme adesu pare go ogege aa i rulu ripinaawa nipumi nunu lalaina adesu. Goa pua mo oname nipuna ini agaa-para adabaa sua goa sa.

<sup>14</sup> Abiare nina ada-para agu raapo pirua opa kalape yaere meda iya-daa sa. <sup>15</sup> Goaene nina ada gimoa ne asapula epawa. Goa pawa-pulu abia ne go epa adalo-da. <sup>16</sup> Goa pua ne patape yapara page aba rabolo saayo. Go yapara rabolo saayo pare nena adipu patape yakopi laplap page epe pepena pubae saayo. Go epe u-patape yaenuri mo Isipi supara mea-epe yaenu saayo. <sup>17</sup> Neme go

nena u-patape epe bet madaare paura epe kaapi  
yae luabu koyoa saayo.

<sup>18</sup> Goa pea-ga abiare saana bana. Goa puare  
raapa palaawa rabialo tu patua yapi malaapania.  
Goa pua raana adaape meapania. <sup>19</sup> Ninaa  
aaniri pala naomape. Nipu su adaalu meda-  
para naepope-rupa pisa. <sup>20</sup> Gore akoloya nipumi  
mone ora adaapupe mea pisa-pulu sarara laapo  
popenaloa orope epalia. Goa pua abia go akua  
epola pola raapu raapu-para epalia.

<sup>21</sup> Go oname epe rede pi agaa luabu loa mo  
ogege aa nipuna lo-robbaa ora waru marekaaya.  
<sup>22</sup> Mo aa nipumi mo omeme agaa pagoa mo onana  
ada-para ratamea pea. Gore mo mena gawa ti  
ada-para mea pemedede-rupa mada mea pea. Go  
page maeyae aa opeada patinalo mea pemedede-  
rupa mada mea pea. <sup>23</sup> Go aa nipuri koyati pua  
sua nipu aawalia kone na-i. Pa yaa-madaa biya  
pua mo poga madaa puua roayade-rupa mada  
pea. Gore yaa nipu poga sabae-para roalua kone  
na-i. Pa biyaa pea-rupa mada pea.

<sup>24</sup> Go naaki nina agaa madaa-re aane waru  
lobapa-inaloa waru pagalepape. <sup>25</sup> Nimimi go  
piaeona rata mea popere nimina lo-robbaa  
ora aipapulu narekena tapape. Goa pua nipuna  
kone gimape. <sup>26</sup> Gore akolo ya? Aa adaapu go  
onana kone ratua luabu taala-pupa yabeme. <sup>27</sup> Go  
ona nipuna ada-para pope porare, aa tapa-para  
pemedede pora-rupa ia. Go yapare nimi go pora  
ratalimiri nimi aipapulu aba omeme onaanuna  
su-para palimi.

**8***Epe kone nipuna pi kogono lapedepeta*

<sup>1</sup> Epe redepone konere ona meda rekaawa onaa yaata-rupa madaa. <sup>2</sup> Nipu so pore madaa pora kepaa-kepaa pea pare aawa yolaaya. <sup>3</sup> Gore nipu adaa ada kagure-na pora kerepo-nane aawa nipumi gupa yaloa lala aaya.

<sup>4-5</sup> Neme onaa nimi luabu yalalo: Nimi kone na-i onaa luabu kone waru kegena mealimina. Nimi aanu kone waru na-imiri ipua kone waru epaa mealepa. <sup>6</sup> Neme epe redipi agaa go lagialo madaa-re, aane waru lobapa ina pirua pagalepape. <sup>7</sup> Neme wae agaa luaburi gi waru pea-pulu neme oro yalo ora agaa riaa laguaayo. <sup>8</sup> Neme yaa-agaa natopare go to agaa luabu ora epe agaa riaa lagialo. <sup>9</sup> Epe kone sua makuae yae waru meme aanumiri neme to agaa-na re-re waru makuaeeme. Goa pea-ga go agaa ora riae yade kone sua waru makuatepape. <sup>10</sup> Nina agaa-me mone mena sekere puri pane yae luabu rabuaaya-pulu neme epe kone luabu nimi mogeano waru pago piralepa.

<sup>11</sup> Nina bipa niri ora epe kone epe yae luaburi ni yade. Neme gol mone oyae luabu page nimimi raana omeme yae luabu page rabuaawa ora puri na-ia tote. <sup>12</sup> Ni epe konena pora pamuape-rupa waru makuaeayo. Goa pua ora epe pora pamuape page ni yade. <sup>13</sup> Aa meda nipu Adaa Aa-na agaa pagoa rataliare wae yaenu pape gime-omea. Neme gimi ome yae-re, aa medame nimuna bi

minasaawa waea pea kone luabu-ri gime ome. Waeanu adaapu pua yaa agaa teme aanu page ora gipea. <sup>14</sup> Onaanu epe kone kaloa epe kogono papena kone page luabu neme mada gialua. Nina bipa niri epe kone yade. Goa pua adaa puri luabuna aaraa page ni yade.

<sup>15-16</sup> Adaa ada kaguare luabu surubenalo aa mudu luabu page king-nu page neme mapiraayo. Goa pua lo waria go onaa luabu epe-rupa surubenalo epe kone neme kaato. <sup>17</sup> Onaa medame ni adalua kone saliare ni mada adalia. Onaa medalomame ni raaname omalimiri neme page nimu raaname waru omalua. <sup>18</sup> Neme onaa adaa bi kaloa oyaenu page ora adaapu kaato. Mone oyae luabu waru kaloa epe kone pora luabu kurinaloa onaanu luabu waru raba mealua.

<sup>19</sup> Neme kaato yaemere epe puri pane gol aana page aana silipa page ora rabuaniaaya. <sup>20</sup> Oro yalo neme epe redepone kone luabu ratu-aayo. <sup>21</sup> Ni raana omeme onaana yaere adaa stua-para kago imi-rupa kirita saayo. Goa pua mo akore kirita i ada-para rulatabena saayo.

<sup>22</sup> Ora abade Adaa Aa-me oyae luabu warisa raburi ririnane ni aba mapiraasa. Goa pua wala oropere oyae luabu warisa. <sup>23</sup> Ora abade Adaa Aa-me su yaa lapo page oyae rayo abi nawarini aawa ni aba waria mapiraasa rabu ni aba pirisu. <sup>24</sup> Adaa Aa-me ipa ogenu page adaa ipa solowaranu page abi nawarini rabu ni aba pirisu. <sup>25</sup> Adaa porenu page oge porenu page abi nawarini rabu ni aba pirisu. <sup>26</sup> Go rabu ni piranore Adaa Aa-me su page abi nawarisa. Oyae luabu

page abi na-opena e maapu nepe yaenu page abi na-isa. <sup>27</sup> Yaa-me ipa solowara mea kutapu isa rabu page Ni aba piritipa. <sup>28</sup> So yaa madaa moae yaakoya page, su-para ipa marakupitabasa rabu page, ipa pa go su madaa adaapu mapopaawa solowara mapiraasa rabu page ni aba piritu. <sup>29</sup> Nipumi suna-re warisa rabu piritu. Goa pua mo ipa solowara repa-repa warisa rabu page ni piritu. Goa pua ipa solwara neme go su nakabulape loa agaa mana lakesa rabu page, ipa neme go salo robo nakabulape sa rabu page ni piritipa.

<sup>30-31</sup> Adaa Aa-me go yae luabu warisa rabu niri go kogono rayo surubanolo makuae aa mada mua mapirasa. Nipumi warisa oyae luabu adoa raana waru pisa-da neme nipi page raana omenalo kogono pisu. Neme go-su adoa onaa pimi su madaa page pedo waru pisu. Goa pisa-da neme Adaa Aa-na ini agaa-na oroyaloo raaname omo aayo.

<sup>32</sup> Epea-para epe kone lapo-me agaa mone mone go-rupa ta. Go nogo naakinu nimimi naa agaa waru pagoa nina kone luabu waru ratalepape. Nimimi goa palimiri epe raaname rubini onaa piralimina. <sup>33</sup> Nimiri neme epe kone gianoloa waru makuae yaeme rubini onaa piralimina. Nimimi go agaa madaa masaa narilatepape. <sup>34</sup> Nina agaa pagoa ratalimi onaare nimi madaa raaname rubialia. Oroyalo nimi naa ada pora-gape para surubeme rabu neme epe kone epe pora mea waato. Nina poragape-para epeme rabu neme epe agaa lage. <sup>35</sup> Onaame ni

mealimi-daare nimu kagaa pirape kone wasupa mealimi. Goa pua Adaa Aa-me nimu repara epe lo-robaa katea. <sup>36</sup> Goa peme pare aanu medalomame ni namealimiri nimuna bipa nimu bebo teme. Onaa-me ni raaname naomalimiri, nimu omape madaa kone mapiraawa peme.

## 9

### *Epe koneme onaa yaata*

<sup>1</sup> Epe koneme epe pora waatalo ada pigi kerepo (7) pua ponoa awea. Gore nipumi epe kone sua go ada pigi eto napape-rupa awea. Go ada pigimi puri paloa ainalo pisa. <sup>2</sup> Yaa-yapa mena tua ipa waini rede waru-pi managola sua eta nape reke page aba managola-isa. <sup>3</sup> Nipuna kogono onanu ada kagure-nini penaloa agaa puri palo pua lalaatepa sa.

<sup>4</sup> Nimumi gupa teme: Nimi mayae wae kone i aanu luabu ipulupa. Nimi epe kone mua epe redepone pora adalimina ipulupa loa mo kogono onanumi yalaala aaeme. <sup>5</sup> Eta page ipa waini epe rede-pi aba managala ia-ga ipua epa nalepa. <sup>6</sup> Nimina maeyae wae kone luabu gimoa epe kone-para epe pora ratalimina ipulupa simi.

### *Aa laapome pepe-a*

<sup>7</sup> Gore neme aa meda maredepo yaatalo pali rabu nipumi nepara aakone sua ero agaa-me abutea. Go page neme aa wae meda epe agaa loa maredepo-yaatalo pali-rabu, go aame ne tua nena yogaene ma-oyaalia. <sup>8</sup> Goa palia-ga wae agaa ne aa maredepo yaawa epe agaa lakelapere gimape. Goa pua ne ora iaa aulalia. Neme epe

aa meda agaa mana laketalo pali-rabu go aame ne raaname waru omalia. <sup>9</sup> Neme epe kone i aa meda agaa lakeloa epe agaa talo palipi-dare go aame ne raana omalia. Goa pua nipuna kone page raaname rubialia. Neme epe-aa kone kate rabu nipuna makuae-yae page adaa-yalia.

<sup>10</sup> Go yapare neme epe kone sua epe-rupa pitua kone sali-daare, neme Adaa Aa-na agaa aba meape. Gote nипу ora epe redepo-yoti aa yade. Gore neme epe makuae yae mealua kone sali-daare, Gote nипу ora aba riri-nane kone mapiraawa aba makuaape. <sup>11</sup> Epe kone-me ne go suamaa ora adaalupu mapiraalia rabu kris-maali adaapu mada pirali. <sup>12</sup> Gore ne epe kone mealirabu nena bipa ne ma-epeaali. Go yapare ne-da wae kone sua waea-pi aa yaliare, nena bipa ne go ma-oyaawa mabebolateda.

<sup>13</sup> Ona meda nипу epe kone na-ia-pulu nипу maeyaaawa puri palo wae agaa loa aa rumaape madaa yaaloaaya. <sup>14</sup> Nipuna ada mo adare ru-para aaya-pulu go adare-na adaa pora kerepo-para aawa yaloa wae agaa loaaya. <sup>15</sup> Onaa adaapu kogono pa pulalo popeme raburi nimi ni piri-para ipulupa loa yalala-aya.

<sup>16</sup> Nimi aa luabu epe kone naimi-ga, nimi maeyae aanu nina ada-para ipulupa. <sup>17</sup> Gore neme ipa meda paake mua nali rabu go ipa kogaroa redepi ipa nali. Eta meda page pake mua nali rabu, go eta page rede waru palia. <sup>18</sup> Mo nipuna ada-para ipulupa ta aanu-ri, nipuna ada-re matmat nonapi ada yapare mo aanumi waru

na-ademe. Nimu kone waru na-imu-pulu ora epe ona yaana kone imi. Go onana ada-para peme aanuri nimu aba omoa nimu ome aanu-rupa pimi pare pa aaema kone sua nimumi waru na-ademe.

## 10

### *Solomon-na remaa (Robo 10.1–22.16)*

- 1 Solomon nipumi epe-rupa pirape agaa rudu-rudu medaloma tusua gupa-sa.  
Nogo naaki medalomame epe kone sua nimumi epe kone ratalimi-rabu agi aaraanumi raana ora waru omalimi.  
Go yapare nogo naakinumi wae pora ratua pupitagi noalimiri, agi aaraa-me page l-robaa kedaa adaa ruaalimi.
- 2 Ne mone paake noa ama-aalidare, nena go moneme ne epe-rupa naraba mealia rabu ne epe-rupa mada na-aali.  
Go yapare neme epe pora ratua amaa yalidare ne na-rudute.
- 3 Adaa Aa-me nipu madaa kone rulaawa pimi onaa, eta neape oyae luabu asa pina kone na-ia.  
Goa pea pare mo waeya peme onaa-re nimu ama-yape, eta asapeme yaenu asapinalo pora poaaya.
- 4 Ki-aa raakepea kogono napaliri, reaeme omoa aa naara pirali pare neme puri paloa kogono waru pali-dare, ne eta page amo yape

page ne oyae meda na-rudu tea-pulu epe-  
rupa aali.

<sup>5</sup> Kone waru i aamere eta napeta rabu mea kirita  
suaaya.

Go yapare ki-aa rakepea kogono waru na-  
paliali nimina ona nogo naaki reaeme  
omoa yaala polo aalimi.

<sup>6</sup> Gote-me epe aanuri nipumi nimu waru raba-  
muaaya.

Goa pea pare wae aa-me nipuna kudiri  
agaa teme rabu onaanu medaloman kone  
mabebola tea.

<sup>7</sup> Gore aa epe meda omea raburi onaame go aa-  
na epe kone niminaawa goa-da pisade loa  
pedo waru peme.

Go yapare wae aanu meda omeme raburi mo  
onaa luabumi go aa naniminae aipapulu  
kone rugulaeme.

<sup>8</sup> Epe kone-i aanumiri pa aa medame epa-ta agaa  
page waru aina madu pageme.

Pare yaa-agaa loa agaa ipa rukini ritimi aa-  
nuri nimu ora pa-rupa oteme.

<sup>9</sup> Epe kone sua epe-rupa piri onaare redepone-  
rupa pirualimi.

Go yapare onaa waea palimidere, nimuna  
peme wae yaenu kudiri-pu na-i pename  
salia.

10 Yaa agaa ne aanumi pupitagi adaapu neme  
pare pupitagi ne aanu nimu yaa agaa  
adaapu loa waea peme-pulu nimu bebolo  
talia.

Go pea pare aa medame agaa pename loa  
onaa mada raba muaya.

11 Epe redepone aanuna agaa-re ora epe ipa laipi  
kata ipa-rupa yade.

Go yapare wae aanuna kone pa kudiripu  
sabaawa onaa mabebola teme.

12 Lo-robaa wae-imu raburi wae-yae maepaaya.

Goa pea pare aa yago meda raana omea  
aamere wae yae luabu pename ma-opaaya.

13 Redepone kone i aamere nipuna epe redepone  
kone agu lapepedepeta.

Goa pea pare wae kone imi aanu aipuya-me  
mea kudu teme.

14 Epe pora ratua epe kone imi aanuri makuae yae  
waru mua aipapulu nalapaeme.

Aa medame yaa-agaa teadare, wae yae  
aipapulu gopara opapaaya.

15 Gore ada kagure kepo pua imi-rupare amone  
aanu nimuna yaenumi nimu kuta pua ora  
epe-rupa pimi.

Goa peme pare aa naara luaburi nimu oyae  
ruduta-pulu nimu aipapulu beboloa oyali-  
imi.

- 16 Redepone aa-me nipuna yoto-rupare, oro yalo pirama-lama palia.  
 Go yapare wae aa-numiri waea adaapu peme.
- 17 Go yapare aa medame nипу maredepo yaina kone saliadare, kagaa pirape supara palia.  
 Go yapare aa meda nипу namaredepo-yaeme rabu rada-pia pea aare go epe pora gimea.
- 18 Aa medame aa yago meda wae kone saliadare, nипуми yaa agaa loa oro yalo waea-pu rabuae aa pename go aaya-da.  
 Go yapare aa medame aa yagona ma-agaa paliare go aa nипу ora maeya aa aaya.
- 19 Aa medame agaa adaapu loaalia-daare, go aa nипуна agaame page wae-yaе yolo rialia.  
 Go yapare aa medame agaa adaapu natea-dare, go aa nипу ora epe kone su ayaa.
- 20 Epe redepone aana agaa-re epe aana silipa-me adea.  
 Go yapare wae aanuna kone-re bebolo-tea.
- 21 Epe redepone aa-na agaa-mere onaa adaapu waru rabamea. Goa pea pare onaa epe kone nasalimi-daare go onaa nimu ora omalimi.  
 Akolo ya? Nimuna kone ora oyotea-pulu nimu omalimi.
- 22 Go yapare Adaa Aa-me niaa oyaenu pama gea.  
 Kedaa kogono-me oyaenu nagialia.

- 23 Epe kone naimi aanu nimu waea pape mada  
raana waru omoa pupitagi neme.  
Go yapare epe kone imi aanuri, nimu epea  
papena raana omoa epea peme.
- 24 Wae aanuri oyae luabu madaa paalame oma-  
limi rabu go wae yae luabu nimu piri  
popalia.  
Go pea pare epe kone rulae aamere oyae  
luabu mada mealimi.
- 25 Gore wae yapi-di meda go wae onaa repara  
popolalo palia raburi, gome nimu ora ma-  
diayaalia. Gore ipa roa oyae luabu kadepe  
ritade-rupa goa palia.  
Go yapare epe-rupa piri onaa-re nimu puri  
palo eto napi piralimi.
- 26 Gore nena kogono pape aare kiaa rakepene aa  
nameape.  
Neme go kogono gi madini aa adali rabu  
ne marasini ne rabu nena agaa-para rero  
piade-rupa palia rabu ne gimapalia. Go  
page nena ini para miru pea rabu poke  
poke yalade rupa palia.
- 27 Neme Adaa Aa-na pora kurua oro yalo  
nipuna rolo-para pirali-dare, ne go su-  
amaaa adaalupu pirali.  
Go yapare wae aanuri go su-amaa adaalupu  
napiri ora aipapulu aba omalimi.

<sup>28</sup> Adaa Aa-na agaa pagoa rati onaamere, Adaa Aa  
nipuna pea kogono ado-kiritua raaname  
ora waru omalimi.

Go yapare wae aanuri pama surubama  
pua, nimumi epe yapi di meda mada na-  
adalimi.

<sup>29</sup> Adaa Aa-me epe redepone onaare waru su-  
rubea.

Go yapare nipumi, wae onaare maoyalia.

<sup>30</sup> Epe redepone aanuri nimuna ada kagure-para  
epe-rupa piruaeme.

Go yapare wae pupitagi ne onaare nimu go  
rupa napiruaeme.

<sup>31</sup> Epe aanu nimu oro yalo epe kone sua epe pora  
rateme-pulu, nimu onaa luabu epe agaa  
lakelo-aeme.

Goa pea pare wae agaa teme aa luaburi nimu  
oyalimi.

<sup>32</sup> Redepone aa-na agaare onaana aane-para rede  
warupea,

pare wae aa-na agaamere onaanuna lo  
robaa-para rero mapaeme.

## 11

<sup>1</sup> Adaa Aa nipuna i robo kabula riri peme aanuri  
oyae waea-rupa rumawa oyae yolateme.

Goa pea pare epea peme onaare raname  
omoa rumaaape epe-rupa popenalo pea.

<sup>2</sup> Nimuna bi minasaeme aanuri yala waru poteme.

Nimuna bi rabuaniaeme aanuri epe kone imi.

<sup>3</sup> Ora epe aanuri nimu epe pora ora rateme.

Pare yaa agaa ne aanuri nimu yaa agaa adaapu teme rabu nimuna go yaa agaame wae yoto mea katea rabu nimu oyalimi.

<sup>4</sup> Epe mone oyae adapu salipare go oyaeme ne omali rabu mada naraba mealia.

Go yapare neme epe kone sua epe pora ratu aali-dare ne go su-amaa page adaalupu pirua epe su page meali.

<sup>5</sup> Epe kone imi aanu nimuna epe koneme epe pora mea wata rabu nimu epe-rupa pirua nimu epe kone sua epeanu peme.

Goa pea pare waea peme aanu nimuna peme wae yaenumi nimu malopaaya rabu nimu lopeme.

<sup>6</sup> Epe redepone aanu nimuri nimuna epe kone maredepoyaya rabu nimu epe-rupa pimi.

Go yapare aanu oyae madaa omeme-pi kone sua wae pora ratulalo peme aanu nimu lopoaa wae-rupa pimi.

<sup>7</sup> Wae aanu nimuna purimi oyae luabu pa mealima kone suaeme.

Pare orope nimu omalimi rabu nimumi epe yae meda mada namealimi.

- <sup>8</sup> Gore epe aanu madaa kedaa page wae yaenu meda epolalo palia-dare Adaa Aa-me nimu raba mealia-pulu nimu madaa wae yaenu mada naepalia.  
 Goa palia-pulu go wae yae luabu mo pupitagi noaaeme aanu madaa popena tea.
- <sup>9</sup> Go page mo wae aanu agaa teme rabu nimuna agaame onaa luabu maoyaatalo peme.  
 Goa palimi pare mo epe aanu nimuna peme-ame nimu rabamealia rabu nimu epe-rupa piralimi.
- <sup>10</sup> Epe aanu nimuna pirape yae puua redepota raburi onaa nimu luabu ora raana omoa epe-rupa piruaeme.  
 Go yapare aa padaneme oroyalo waea puawa nипу омее рабу onaa luabumi epe ta kone sua raana omeme.
- <sup>11</sup> Epe redepone aanumi nimuna ada kagure-para epea peme rabu nimuna ada kagure page ora epe-rupa surubeme rabu epe-rupa aaya.  
 Go yapare wae pupitagine aanu mi waea pulalo peme rabu go teme agaame mo ada kagure page ma-oyaeme.
- <sup>12</sup> Aa medame aa medana pi-lawa ero agaa tea-daare go aa nипу маёяе aa-rupa pia.  
 Pa pirua agaa adaapu nalainalo ora epeta.
- <sup>13</sup> Aanu medalomame maa agaa adaapu teme-pulu nimuna adami aanuna i kone page pa

lapedepeteme.

Goa peme pare ora agaa ne aanumi nimuna  
adami aanu kudiripu i kone nalapedepe  
teme.

<sup>14</sup> Gore mo gavman pimi aa mudunumi  
onaa luabu epe-rupa maredepoyawa  
nasurubaliare go onaa rayo oyoa mo kantri  
page oyalia.

Go yapare aanu adaapumi go aanu epe kone  
epe agaa laketeme rabu epe-rupa maredo-  
depo yawa epealia rabu mo onaanuna  
kantri page epe-rupa aalia.

<sup>15</sup> Aa medame yano mua na-abutea rabu neme  
abulalua te pare wala neme na-abulali-  
daare ne orope kedaa epalia.

Goa palia-ga ne ora epe-rupa pirano kone  
sali-dare neme mogo yaenu luabu masa  
rilaawa gimape.

<sup>16</sup> Onaame medaloma nimu ora epe ona loa adaa  
bi kana kone sua gupa peme. Yapare pa  
pora pame ona onaa medaloma mayala  
peme.

Kiaa rakepene aame mone mada namealia  
pare kokono waru pe aame oyae adaapu  
mealia.

<sup>17</sup> Gore neme aa meda odome omoa nипу  
rabamealiri go palideare nena bipa ne-  
para wala pe.

Pare neme aa meda waea pali-daare goame  
nena bipa ne page go maoyaaye yade.

- 18 Waea pi aanumi oyae meda mulalo palimi-daare go yaeme nimu ora mada naraba mealia rabu waru yae-da nona napalia.  
Go yapare aanu medaloma epeanu palimi-daare nimu epe yoto mealimi.
- 19 Aanu medalomame puri paboa epe kone ratal-imiri gore nimu oro-yalo piraama laama pope kone wasupa mealimi.  
Go yapare waea papena puri pabeme aanuri nimu omalimi.
- 20 Adaa Aa-me oro yalo wae kone imi onaare ora waru gipia.  
Go yapare epe-rupa aaeme onaare raaname omea.
- 21 Gore ora ria wae onaare wae yoto mealimi pare epe onaare mada wadialimi.
- 22 Gore ona meda ora epe pepena pualia pare nипу kone wae sua pora pamu agaa tea-daare nipumi pama tona pepena paaya.  
Gore mena ini-kadu madaa mere mudiaawa pepena paawa punitimi mena nonapi pia.
- 23 Adaa Aa-me onaa luabuna imi kone-para pameme pora go rayo aba ado kiritea. Epe redenee aanu madaare epe kone luabu rubita.  
Go pea pare waea peme onaanumi epe oy-aenu mealimi rabu onaa medalomame nimu madaa wae kone imi.

24 Aa medaloma nimuna mone oyaenu page aa medaloma raba mulalo kateme. Pare nimuna bipa mo peme kogonona yoto ora adaapu meme.

Wala aa medalomame onaa rabameape kone nimirawa yapare wala gimeme. Nimuna mone oyae waru adaapu pagaa imi pare wala oropere go oyae luabu rudu ta rabu nimu wala naara aanu-rupa aeme.

25 Aa medame oyaenu pa onaa kalawe kone sua oyae rumo kata pare nipuna bipa ora adaapu saayo kone sua pama pea.

Go yapare neme pa aanu medaloma rabameli-dare nimumi ne page rabamealimi.

26 Reaa pabea rabu onaame eta kabolalo agaa mealimi pare dia tea-dare go aa nippu wae kone suaeme.

Go yapare aa medame nipuna eta onaame kabena tea-dare mo onaame go aa nippu ora raaname omalimi.

27 Aa medame epe kone sua ora epe pora ratualia-dare onaa rayome nippu raaname waru omalimi.

Go yapare wae aa-me agu puialiare go wae kedaa nippu madaa popalia.

28 Gore aame nina mone oyaeme ni waru rabamealia kone saliare go aa nippu repena yo kaapu-rupa ora alupalia.

Pare nипу ере redepone-rupa aawaliare nипу  
kagaa repena maa pula saayade-rupa opoa  
epe-rupa piralia.

- <sup>29</sup> Go yapare aa meda nipuna ona naaki ruruna  
oyae waru nasurubaliare nipuna oyae lu-  
abu ora dia yalia. Goa pua ora alupalia.  
Goa palimi-ga epe kone imi aanu kogono pa  
palimina.

- <sup>30</sup> Epe aana kone-re epe repena kagaa laama pope  
repena aaya-rupa aalia.  
Aa meda nипу ora epe kone sua makuae aa  
pia raburi pa aanu medaloma nипу raapu  
epa pируaina kone ia.

- <sup>31</sup> Gore niaame aba adema. Epe-rupa pimi  
aanuna pemeare nimu go su-amaa pirua  
oyae adaapu epe yoto-rupa mua pimi.  
Goa pea pare wae aanu nimuna wae yoto  
ora mealimi-ga nimu ora pakealimi kone  
nasamina. Dia Adaa Aa-me nimuna wae  
yaena yoto ora katea.

## 12

- <sup>1</sup> Aa medaloma nimu ora epe kone madaa  
raaname omoa pa aa medame maredepo  
agaame madaa page epealia kone imi.  
Go yapare aa medame nipuna pea wae yae  
namaredopo yaena kone aamere nипу ora  
maeyae aa-rupa pirua pea.
- <sup>2</sup> Gore aame epe pora ratua epe kone suayare  
Adaa Aa-me go aa nипу epe lo robaa kata.

Go yapare aa medame onaa para waea  
paliare go aa nipuri Adaa Aa-me alu-  
painata.

<sup>3</sup> Gore aa meda waea pua epe-rupa napi-  
ralia raburi go peame nipu mada naraba  
mealia-pulu epe-rupa napitia. Nipu puri  
pabo page napiralia.

Goa pea pare aa meda nipu ora epe pora  
ratua piraliare repena pitaa su runane pea-  
rupa mada yapulu aa medame nipu mada  
narasu lopalia.

<sup>4</sup> Aa medana oreme epeanu paliare mo aani go  
pea kogono-me epe bi kata.

Go yapare mo aa nipuna oreme waea rado  
rado adaapu pua aani page yala mea  
kata. Go pua mo ona nipumi peame wae  
yaina ipua mo aanina uni rodaipa-para  
odobaawa yaina-rupa mea kata.

<sup>5</sup> Epe redepo ne aa-mere oro yalo epea pape  
madaa raaname waru omea.

Go yapare wae kone sua waea pea aamere  
oro yalo yala poloa onaana kone mabebola  
pena wae pora mea watalo pea.

<sup>6</sup> Wae aanuna agaa-re aa medalomame kudiripu  
yada sua aa yago tulalo pemedede-rupa kone  
imi.

Go yapare epe redepone aanuna agaa-me  
onaa medaloma kedaa rua yaina omeme

rabameapena kone sua agaa teme. Epe-  
rupa pirina kone sua agaa teme.

<sup>7</sup> Aa medame waea pualiare nипу оyoa ora alu-  
palia.

Goa palia pare epe redepone aanu-nimuri  
epe-rupa oro yalo pa piralimi.

<sup>8</sup> Aa meda nипу epe kone su aaliare onaame go aa  
nipuna bi minasalimi.

Go yapare aa meda nипу wae bebone kone  
saliare onaame go aa nipuna bi mabebo  
laeme.

<sup>9</sup> Aa meda bi waru na-i aa yapare kogono aa meda  
nipuna ada-para ma-aaliare epe ta.

Pare aa medame nипу adaa aa kone sua  
naara aanu rabuaatalo kone ia-pulu nипу  
naepeta rabu eta nepe yaenu page rudu  
neme pama pea.

<sup>10</sup> Epe redepone aanumi nimuna mena oyaе lu-  
abu madaa odome waru omoa epe-rupa  
surubeme.

Go yapare wae aanu nimuna mena oyaenu  
page waru epe-rupa nasurubeme.

<sup>11</sup> Aa medame nipuna e maapu waru surubaliare  
gore nipuna eta nepe yae waru salia.

Go yapare aa medaloma epe kone naimiri  
nimu pama kalai pua kogono pu sua epe  
ini meda namealia.

**12** Wae aanu pupitagi noa oyae adaapu wae-rupa  
meme. Goa pua nimumi oyaenu madaa  
epame waru omeme.

Epe redepone aanu nimuna meme yaenuri  
nimuna mo peme epe konena ini raloa  
meme. Goa pua nimumi oyae ora adaapu  
imi.

**13** Wae aa nimuna teme wae agaa-me nimuna  
bipa nimu adita.

Goa yapare kedaa wae meda epe redepone  
aanu madaa popeare nimuna epe koneme  
nimu wala epe-rupa rabamea.

**14** Neme tede epe agaa-para nena epe pamualide  
porame ne maepealia.

Goa pua ne epe-rupa piruali.

**15** Kone epe-rupa na-imu aanumiri nimuna pema  
oyae rayo ora epe ta kone imi.

Go yapare epe kone imi onaa agaa mana  
laketeme rabu ora epeta kone imi.

**16** Epe kone naimi aanumi waea meda pu-  
lalo peme raburi nimumi go madaa ratu  
aipapulu yaweme.

Go yapare epe kone i aa meda ero agaa teme  
raburi go aa nipu epe kone ia-pulu pinawa  
kone sua gimalia.

**17** Koso rabami aa epe yaliare agaa waru eperupa  
tea.

Go yapare nipu agaa waerupa ne aa yaliare  
nipumi koso ma-oyalia.

**18** Aa medame kone waru nasua tea agaa-me epe  
aa medana robaa-para maoyalia.

Goa palia pare epe redepone kone i aa-me  
agaa tea-daare mo aana lo robaapara epe  
kumaa waru katea.

**19** Yaa teme agaa luaburi pa rudupu yapina ia  
rabu aanumi kone rugulaawa gimeme.

Goa pea pare ora ne agaa luaburi oro yalo-  
yalo pa suaalia.

**20** Aanumi waea peme rabu go pemeame nimuna  
bipa nimu makiraeme.

Goa peme pare aa medame epe kone sua  
onaa rabameano kone sua epea palia-  
daare nipu page epealia.

**21** Redepone aanumi pupitagi page ora nanoa epe  
oyae mealimi.

Goa peme pare waea peme aanumiri nimumi  
wae pupitagi rado-rado adaapu neme.

**22** Yaa-agaa teme aanu luaburi Adaa aa-me nimu  
ratu waru yawoa gimea.

Goa pea pare epe kone sua epea peme aanu  
madaare raana omoa epe ta kone ia.

**23** Aa meda nipumi epe aanu puayare nipuna epe  
kone epea luabu aipapulu ratea.

Goa pea pare aa meda nipu epe kone-nai  
pa wae-kone rubitabe aa nipumi yaa agaa  
adaapupe madu koyoata. Goa pea pare

onaa luabumi nipuna agaa pagoa go aa-re  
maeyae aa-rupa pia teme.

<sup>24</sup> Kogono radaa pina paliade aare nипу puri mua  
mada pitea.

Goa palia pare kiaa rakepene aanuri pama  
kogono aanu pitimi.

<sup>25</sup> Go page aa medame oro yalo kone adaapu su  
aalia-dare nipuna kone oyo tua maeyae aa-  
rupa pitia.

Goa palia pare wae aa nipuna adami aa-me  
epe agaa redepone laketea-dare mo nipuna  
adami aa-me epe kone lo robaa waru katea.

<sup>26</sup> Epe redepone kone i aanumi nimuna adami  
aanu epe pora mea wateme.

Go yapare mo wae aanu nimuna adami aanu  
epe pora gimoa wae pora para mea peme.

<sup>27</sup> Kiaa rakepene aame yapa asa nola palia pare  
mo yapa mada natalia.

Pare kalai pua kogono raadapi peme aanuri  
epe-rupa riri-nane epope aanu go yade.

<sup>28</sup> Aa neme epe pora ratua aawaliri ne ora epe-  
rupa oro yalo pirape yada mua ne epe-rupa  
pirali.

Gore niaame go epe pora ratalimare niaa  
omape yaeme page nami epe-rupa oro yalo  
piralima.

## 13

<sup>1</sup> Gore naaki medame epe kone saliare nipuna  
aapana agaa waru pagea.

Agaa rasini naaki-mere pa aanumi nипу  
maredepo-yaina kone na-ia.

<sup>2</sup> Epe agaa ne aamere nipumi epe oyaenu mualia.

Go yapare yaa agaa ne aanuri nimumi ro-  
gaawa i agaa rasitimi. Goa pua onaa luabu  
ma-oyape madaa raaname waru omeme.

<sup>3</sup> Aa medame nипу agaa abulu waru suruboa epe  
agaa loa aaliare nипу mada na-oyalia.

Go yapare wae agaa loaeme aanu nimu oyoa  
beboteeme.

<sup>4</sup> Kiaa rakepene aanumi oyae adaapu meawe  
kone sua aaeme pare nimume go yae mada  
nameme.

Go yapare radaa noa kalaipu kogono peme  
aanumi oyae adaapu meme. Gore oyae  
adaapu nimuna raana omeme-rupa meme.

<sup>5</sup> Epe redepone aanu nimumi yaa agaa loa maki-  
rape madaare gimi omeme.

Go yapare wae aanumi yala pia agu pulalo  
peme pare nimu madaa yala paala an-ia.

<sup>6</sup> Aa-me epea agu paliare nipuna go peame nипу  
surubea rabu epe-rupa piruaaya.

Goa pea pare wae-pupitagi neme aanu nimu  
go wae yaena yoto mua wae-rupa piralimi.

- <sup>7</sup> Aa riabo naara aa medalomame nimu mone oyae adaapu sawe kone madaa makirae kone suaeme.  
 Amope mone oyae ora adaapu i aanumi page go-rupa mo aa naaranumi imi kone sua aeme.
- <sup>8</sup> Gore wae aanumi amone aa tulalo palimiri nipumi mone oyae adaapu mogo aanu kaloa epe-rupa piralia.  
 Go yapare aa riabo naara nimuri oyae page naimi-pulu wae aanumi nimu nabebo-laeme.
- <sup>9</sup> Epe redepo aanu nimuri laba paa roaya-rupa mada pimi.  
 Pare wae aanuri mo laba oyoa uduna repe-repe piade piaene pimi.
- <sup>10</sup> Pupitagi nape konemere go aa kone wae madaa yada ratu runane mea pea.  
 Go yapare aa yago medame nипу maredepo yaina kone ia aare epe kone sua waru makuaya.
- <sup>11</sup> Aa medame kogono napi pama awa ode mone muialiare go mone ora dia yalia.  
 Go yapare aa medame kogono pua mone pawa oge-ogepu mea kirita samama pua ma-adaa yalia-dare go mone ora adaa yalia.
- <sup>12</sup> Aa medame oyaenu meda mealua kone sua adaalupu suruboa namealiare nипу lo

robaa kedaame omalia.  
 Goa palia pare nipumi go oyae mu minuare  
 nipuna kone pu robaa-para page epe ta  
 kone sua raaname omea.

- 13 Aa yago medame aa meda epe agaa epe  
 pora waloa agaa mana laketalo palia rabu  
 nipumi gimalia-daare go aa nипу oyalia.  
 Go yapare aa medame agaa maana teade  
 waru pagalia-daare go aa nипу epe-rupa  
 pirualia.
- 14 Epe redepone aa-na agaa ora epe ta-pulu ipa  
 laipi epe-rupa oro yalo pirama lama pope  
 ipa-rupa pia.  
 Go agaa-me aa rabamealia rabu epe-rupa  
 pirua wae yae madaa pakealimi.
- 15 Gore aa medaloma epe kone saliamiri onaa  
 medalomame nimu bi minasalimi.  
 Go yapare rogaa i agaa rasini aanu nimu wae  
 pora ratua pamueme.
- 16 Aanu epe pora ratua epe kone salimiri epe kone  
 aba sua oyae peme.  
 Go yapare wae-rupa agaa lo wae pora rateme  
 aanu nimuna pemeanu luabu pename  
 amaa mea watea. Goa pua nimuna maeyae  
 kone pename amaa ia.
- 17 Gore agaa yaa loa makirae agaa pereke-pereke  
 teme aanu nimu wae kedaa mea epope  
 kone sua aeme.

Go yapare aame agaa mea ipua go agaa redepone onaa lakeloa epe-rupa rabamealia-dare epe-rupa pitimi.

<sup>18</sup> Aa meda aa yagome nипу maredepo-yaina kone na-i nipuna bipa nипу kone-kone sua aaliare nипу oyoa aa naara pirua ora wae-rupa piralia. Goa pua nипу yala polo aalia.

Goa palia pare aa meda nипу pa onaame maredepo yaina kone sua maredepo yaina teare go aa nипу onaa luabumi epe bi kateme rabu ada bi mealia.

<sup>19</sup> Aa medame whose friend oyae meda mealua kone sua orope mealiare nipuna lo robaapara raana adaa omoa pedo pedo adaa pua aalia.

Go yapare wae aanu nimumi nimuna wae yae gimae kone na-i pa pu aaeme.

<sup>20</sup> Go yapare go aa nипу epe kone i aa raapu pora pamualiare go aa nипу page go aa-na kone mua nипу epe kone raapu pamualia.

Go yapare aa meda nипу wae kone i aa raapu pamualiare go aa nипу wae yaeme nипу mealia-pulu wae pupitagi-na rolo-para piralia.

<sup>21</sup> Wae yaeme pupitagi ne aa nimu ora mulalo rapea.

Pare epe redepone aanu nimuri nimuna meme epe yaere nimuna yoto-rupa meme.

- <sup>22</sup> Epe aa meda nипу омea рабuri nипuna sinu page nипuna oyae luabu nimu meme.  
Go yapare wae aanumi oyae adaapu mea kirita imi yaenuri orope epe aanumi meal-imи.
- <sup>23</sup> Naara pimi aanuna e-maapu-para eta nepe oyae adaapu inalo pare adaa aa mudunumi makirawa go eta nimu muuaeme.
- <sup>24</sup> Aaraame nипuna naaki pupitagi nalia rabu nипу ki paarame nataliare gore nипumi go naaki mana nata-pulu go naaki raname na-omea.  
Go yapare araame nипuna naaki agaa mana lakeloa maredepo yayaa-re ora nипuna si kone ia.
- <sup>25</sup> Epe redepone aanuna eta ora adaapu rulatabena imi.  
Pare wae pupitagi neme aanu nimu oro yalo reaeme omo-aaeme.

## 14

- <sup>1</sup> Epe kone ia oname nипuna ada-para page epe kogono pea. Go koneme nипuna nogo naaki onaa luabu raapu puri mapabawa eperupa pimi.  
Go yapare ona meda nипу epe kone nasaliare nипuna bipa nипuna nogo naaki ada oyae luabu ma-oyaawa wae-rupa pitimi.

**2** Epe konena pora ratua pia aamere Adaa Aa-na surube rolo-para pia.

Go yapare yaa agaa ratamea pe aanumiri Adaa Aa-re ora epe yae-da dia kone imi.

**3** Epe kone na-imu aanuna agaa teme raburi on-aana ini agaana nimumi nimuna bi minasae agaa oraa teme.

Epe kone i aa-na agaa ta rabu ora epe ta-pulu nипу rabamea rabu epe-rupa aaya.

**4** Mena gawa su awoa e poape meda diayalia raburi mo eta krita i ada pa pupaa salia.

Pare mo mena gawame e poalia raburi emaapu para eta ora adaapu sualia.

**5** Koso raba mi aa-me koso ada-para epe redepone agaa tea rabu mo kosome ora ne agaa pagalia.

Go yapare nипу yaa-agaa ne aamere mo ta agaa luabu yaa agaa tea.

**6** Wae aakone ne aanu nimu epe kone mulalo palimi-daare nimu epe kone mada namealimi.

Go yapare aa nipuna kone epealiare mo epe kone meape madaa kalai napi pawa kumapi-rupa aipapulu mealia.

**7** Ne mo wae kone imi aanu raapu meda-para napiri ne ora mopare yola-moneape.

Gore nimumi ne epe kone meda mada nagialimi.

**8** Aa nipu epe kone sua nipuna eta no pora pamea  
      yae luabu ora epeta. Go yapare aa meda  
      nipu epe kone na-iare nipuna bipa nipa  
      makiraaya.

Gore akolo ya? Nipuna kone waru na-ia-pulu  
      nipu maeyae aa pia.

**9** Epe kone na-imu aanu nimuna pulalo peme yae  
      rayo pa kone padane agu sua peme.

Goa peme pare epe aanu nimuna bipa epea  
      agu peme. Goa pua nimu lo robaa padane-  
      para sua peme.

**10** Aa nipuna bipa nipuna lo robaa-para ia keda  
      page raana page nipuna bipa makuaya.

Goa pua wala aa yago meda mada namea  
      watea.

**11** Wae aa nipuna ruru ona nogo naaki luabu ora  
      oyoa luabu dia yalimi.

Go yapare mo epe redepone aa-na ruru ora  
      puri waru mua nimu ora epe ruru piralimi.

**12** Aa medalomame gupa kone imi: Nimuna pema  
      yae rayo epe ta kone sua peme.

Go yapare nimumi pama pama pua omalimi.

**13** Niaame giri lo aalima page wae lo robaa keda  
      niaa mada nagimalia.

Raana omo pirape yapi-di rabu page lo robaa  
      keda ora mada na-dia yalia.

**14** Wae aanu nimuna peme wae yae madaa ini noa  
      raana waru omeme.

Go yapare epea peme aanu nimu pedo raana waru peme.

**15** Aanu nimu makuae yae ogesi i aanumi agaa iarupa luabu kone waru rulaeme.

Goa pea pare kone epe-rupa ia aame nipuna lape agaa rayo waru kone makuaawa ta.

**16** Epe kone i aa nipumi nipuna kone waru suruboa nипу madaa wae yae ora naepena kone ia.

Wae aame re oyae rayo pa epeta kione sua rayo pa palua kone sua pa pama pea. Nipu wae aa yade kone page na-ia.

**17** Ratu yawe aanumi maeyawa ratu ora aipapulu yaweme.

Onaa luabumi aa meda oro yalo nipuna raana ratuaaya madaare gimi omeme.

**18** Aa medaloma ogesi makuawa nimu mo maeyae aanuna kone rateme.

Go yapare epe aanu nimuna makuae yaere nimuna alu-para epe pepena peme raguname adea. Go aa nipuna ia kone-re epe aaluna pepena yade.

**19** Wae pupitagi aanu nimu mo epe aanu pitimi-para pirua nimu rabamu eta epe yaenu kanalo agaa lo piralimi.

Nimu odome omena kone sua pitimi.

- <sup>20</sup> Aa medaloma oyae rudu teme adape-re gime omeme. Nimuna aapa ame yalia page ora gimeme.  
 Amone aanu nimuna adami aanu adaapu aawaeme.
- <sup>21</sup> Aa medame aa yago meda naara mapiralia-re go aa nипу маевава наараме пама пеа.  
 Go yapare aa medame oyae ruduta aanu madaa odome omoa titi omalia-daare go aa nипу епе рагана мелия.
- <sup>22</sup> Aanumi wae yae oro yalo pumuna kone sua pualimiri nimuna kone ota.  
 Go yapare aa medame epea peme mada rana omoa onaame epe pora ratina kone salia-dare epe kone go aa waru kata.
- <sup>23</sup> Neme kogono waru radaa pina pali-dare ne ora epe yoto meali.  
 Go yapare ne pa pirua agaa wariba pirali-dare ne wae naarame omali.
- <sup>24</sup> Epe kone ia aa-na konere nimuna mone yade.  
 Go yapare aa medaloma epe kone na-imire nimu maeyae kone agu su aaeme.
- <sup>25</sup> Gore aa medame koso raba mu agaa epe-rupa teare mo kosome aa tumaomaarinare waea pana tea.  
 Go yapare mo koso raba meape agaa epe-rupa nateare go aa nипу makira agaa ne aa.

- 26 Aa meda nипу Adaa Aa-na agaa ratua kumapi-  
rupa piraliare nипу oyae meda palame na-  
omalia.  
Goa pua nipuna nogo naakinu page nimu  
luabu epe-rupa piralimi.
- 27 Adaa Aa-na agaa pagoa nипу ratapena konere  
ipa laipi kagaa piraama lama popena re  
yade.  
Go kone i aanu madaa wae yaenu naepalia.  
Go pua mo wae yaenu epolalo palia page  
mada mapakealia.
- 28 Aa mudu king medame onaanu adaapu su-  
rubaliare nипу adaa bi mea kateme.  
Go yapare mo aa mudu king nipumi onaa  
ogepusi surubalia raburi nипу adaa bi  
nasalia.
- 29 Aa meda nипу ratu aipapulu nayawear go aa  
nипу ora epe kone waru ia.  
Go yapare ratu yawe aa maeyae kone ora epe  
ta kone ia.
- 30 Aa meda nипу pu robaa kumapu pawa ina  
pirualiare nipuna to yogaene page epealia.  
Go yapare aa meda nipumi wae agaa loa oro  
yaloyae epame omape kone sualiare wae  
yaina go aa nипу madaa pupua nipuna uni  
luabu mada maopaya.
- 31 Gote nipumi onaa raayo warisa-pulu aa

medame go aa nere ora aa naare wae te-dare neme Gote page wae gote yade te.  
Go yapare Gote adaa bi katere naaranu page epea pali.

<sup>32</sup> Wae aanu nimuri nimuna peme wae yaenumi nimu maoyaeme.

Goa peme pare epe-rupa pimi aanu nimuri oyae meda page ake palua pae kone na-i epe rupa aeme. Nimu madaa omape yaeme mealia rabu page kone rulae yae mada puri paboa aalimi.

<sup>33</sup> Kone epe waru na-imि aanu nimuna bipa aba makuaeme. Makuae yae-para epe kone lapore nimumi minalo suruba pia pare nāmeme.

Go yapare epe kone imi aanu nimuna minalo epe kone epe pora ratua oro yalo muaeme.

<sup>34</sup> Gore onaa luabumi epe kone sua epe agaa ratalimiri go kantri epealia.

Go yapare nimumi wae-yaenu pa pala pitimiri nimu yala adaa poteme.

<sup>35</sup> Aa mudu king nimuna kogono aanumi epe kogono peme raburi nimu madaa raana waru omea.

Kogono aanumi wae kogono peme raburi mo aa mudu king nipi yala mapaeeme. Goa peme rabu king nipumi nimu ratu yawalia.

## 15

<sup>1</sup> Aa medame ne-para ronopi agaa meda tea-dare

nipuna agaa kumapimi abulape. Goa pali rabu nipuna ratu yawe kone dia yalia.

Go yapare neme aa meda-para ero agaa loa yala mapaliri mo aame ratu adaa yawoa ne-para ratu waru yawalia.

<sup>2</sup> Aa medame epe kone sua epe agaa teare nimumi go aa-na kone makuae yae ora epeta loa raana omalimi.

Go yapare aa meda epe kone na-imi agaa tea-dare go agaa re nai agaa ta.

<sup>3</sup> Adaa Aa-me su luabu-para pea yae rayo ada makuaaya.

Nipumi epe aa wae aa luabu ado kiritea.

<sup>4</sup> Aa medame epe agaa onaa luabu laketa rabu go agaa pageme onaa luabu nimu laipi kalape repena nonapina agaa pagalimi.

Go yapare aa medame onaa-para wae agaa-teare onaa luabuna kone ma-oyalia.

<sup>5</sup> Aa meda nipu epe kone na-saliare nipuna aa-pana agaa rasita.

Goa pea pare pa aa medame nipu agaa loa maredepo yaina gimaliare go aa nipu ora epe kone mealia.

<sup>6</sup> Epe aanu nimu luabuna ada-para oyae ora adaapu imi.

Wae aanu nimuna mone-me nimu kedaa ora adaapu mea kata.

- <sup>7</sup> Epe kone imi aanumi onaa luabu epe kone kateme.  
 Go yapare epe kone rudu teme aanumiri goa page napeme.
- <sup>8</sup> Adaa Aa-me waea peme aanuna opa kateme yae luaburi ora gimea.  
 Pare epe redepone aanumi teme betene raana omoa pagea.
- <sup>9</sup> Adaa Aa-me wae aanumi peme yae luaburi ora raaname naomea.  
 Epe aalu nimumi agaa ratua peme rabu raaname omea.
- <sup>10</sup> Aa medame epe pora minarepaliare wae yoto mealia.  
 Aa meda nипу maredepo-yaina lape gimaliare nипу omalia.
- <sup>11</sup> Adaa Aa-me aba ome onaa luabu pimi-para ado kiritea.  
 Go su amaa onaa niaana ima kone page luabu ora waru aba ado kiritea.
- <sup>12</sup> Aakone i aamere pa aa medame nипу maredepo yaina kone ora na-ia.  
 Goa pea-pulu aa meda-para nипу epe kone gialepa natea.
- <sup>13</sup> Gore aa medana robaa-para epe kone saliare nipuna ini agaa-para epealيا.  
 Go yapare aa meda nipuna ini agaa-para roke rialiare nipuna robaa-para ota.

- 14** Epe kone ia aamere puri palo kogono waru  
 pua oyae meape madaa page makuae yae  
 meape mada page kogono pea.  
 Go yapare wae kone i aamere maeyae agaa  
 talo agu pea.
- 15** Aa meda nипу oyae rudu ta raburi oro yalo kone  
 adaapu sua nипу wae-rupa piruaya.  
 Epe kone sua raana raana-me oroyalo ome  
 aare epe eta nolalo peme rana mada omea.
- 16** Gore neme oge oyaesinu saa pirua Adaa Aa-  
 na agaa pago ratua nipuna rolo-para pitid-  
 daare gore ne epe-rupa pirua kedaa riawa  
 yaeme mone adapu i amope page rabuani-  
 aaya.
- 17** Aa yago raana ome kone-re ririnane agaa go  
 yade. Nena adami aanu raapu meda-para  
 pirua padi raani no piralimiri gore epeta.  
 Go yapare raana naome aanu raapu gawa  
 midi no pimidi rabuaaye. Gore nimu raapu  
 mena no piri nona palia.
- 18** Ratu yawea aamere mo aa meda page ratu  
 mayawaya.  
 Go yapare epe lo robaa kumapu i aame aanu  
 medaloma-na kone lo rabaa pawa ma-  
 epeaya. Goa pua nimu lo robaa padane-  
 para sua mapiraya.
- 19** Kiaa rakepene aamere nипу epe kumapi-rupa  
 pirape yaere ota kone ia. Goa peapulu nипу

pa raa rugulua pamuaya.

Redepoya pia aa nипу oro yalo kagaa pirape  
yae epe ta kone ia. Gore epe poranini  
pamema-rupa madaa.

<sup>20</sup> Epe kone i naakiri agi aarame raaname omepe.

Go yapare naakimi epe pora naratalia-re go  
naakimi agi aaraa gimaaya.

<sup>21</sup> Epe kone na-i onaa-me maeyae kone ratape  
page pedo waru peme.

Go yapare epe kone ia aamere nипу oro yalo  
epe kone ratua epea pu aaya.

<sup>22</sup> Neme kogono meda pulalo pali-dare aanu  
adaapuna kone aba meape. Goa pali raburi  
mo nena palide kogono luabu ora epealir.

Go yapare neme aa medana kone namealiri  
nena kogono ini namadialia rabu pama  
kalaipu kogono pusali.

<sup>23</sup> Aa medalomame agaa lo pitimi rabu riaa lo  
kiritina loa neme epe agaa meda te-daare  
go rabu ne page raana palia.

<sup>24</sup> Epe kone i aare so madaa porana opasari  
pea-pulu nипу epe-rupa pirape pada puaa  
mealia.

Goa pea-pulu nипу no rolopara-ia poranini  
pua ome onaana pada wala napua mealia.

<sup>25</sup> Aa meda nipuna bipa nipuna bi minasalia rabu  
Adaa Aa-me nipuna ado bebo malalia.

Go yapare ona wasa aani aba omere rabamealia. Aa medame go onana su mada namealimi.

<sup>26</sup> Wae kone luaburi Adaa Aa-na ini agaa madaa pugu waru pea.

Goa pea pare epe redepoyoa rolo ti agaa madaare nipuna ini agaa madaa epetada raana waru omea.

<sup>27</sup> Aa medame mone adaapu orayo kone sua wae pora ratua mealiadare nipuna ona nogo naaki-na rikirane wae keda mea epea.

Aa medame nipu mone kanalo omeme pi kone wae narataliare nipu epe-rupa pilalia.

<sup>28</sup> Epe redepone aame kone aba waru niminaawa aa medana agaa orope abuta.

Go yapare wae aa-me agaa aipapulu talo pea raburi nipuna agaa wae luabu pa ta.

<sup>29</sup> Waeanyu peme aanu nimuri Adaa Aa raapu repara nae mopare yolamonea aeme.

Goa pua nipumi mo epe redepone aanuna betene teme rubu aane lobapaina pirua waru pagea.

<sup>30</sup> Neme aa meda adali rabu ini agaa-para esepea raaname omalia-dare epe kone go ida.

Epe agaa remaa meda pagali rabu go remaame nena to yogane ora puri mapalalia.

31 Aa medame nипу maredepo yatalo palia rabu aane luyapa ina pirua pagaliri nипу epe kone sua makuaali.

32 Epe-rupa pirape madaa maredepo-yatalo palimi rabu agaa rasua gimaliare nipuna bipa nипу ma-oyaaya.

Goa pea pare aa medame nипу maredepo yatalo pea aana agaa pagoa rataliare gore nипу epealia. Goa pua nipuna kone page lobataboa nipuna makuae yae page epealia.

33 Adaa Aa-na rolo-para awalidare epe kone meape porana re go iada.

Nena bipa ne narabuniaawa epe pora narataliri gore ne adaa bi mada nameali.

## 16

<sup>1</sup> Niaame oyae meda palima kone ima yaere Adaa Aa-me epe ta-ga pipa tea-da pamina.

<sup>2</sup> Niaana pema oyae luaburi Gote-na ini agaa mada redepo ta kone ima.

Go yapare Adaa Aa nipumi niana kone waru mea rumu adoa rekepuu makuaaya.

<sup>3</sup> Neme yae meda pulalo pali-daare Adaa Aa nipuma ki-nane aba saape.

Goa pali rabu nipumi go yaenu luabu ora ma-epealia.

<sup>4</sup> Adaa Aa-me oyae luabu waria kogono padane padane laatapu kata. Go-rupa agu Adaa

Aa-me waea peme aanu page nipumi warisa.  
 Goa pua orope su yaa diayalia rabu nimu koso loa alupaina tea.

- <sup>5</sup> Adaa Aa-me waea pua nimuna bi minasaeme aanu adape ora gime omea.  
 Adaa Aa-me nimi pa pupulupa pi-da natea-ga waru adamina. Dia nimu kedaa waru mea katea.
- <sup>6</sup> Aa medame Adaa Aa mada raana waru omo nипу raapu pogatu piralipiri gore Adaa Aa nipumi go aana wae yae luabu mea rubalia.  
 Aa medame Adaa Aa-na agaa ratua piralia raburi Adaa Aa-me pupitagi naape kone namasalia. Goa pua nipumi oyae luabu kone rugulalia.
- <sup>7</sup> Gore aame mo Adaa Aa nipuna raana omea kone luabu ratua nipuna iaanu raapu epe kone sua piralia-rabu Adaa Aa-me raba-mua epe onaa raapu mapiraalia.
- <sup>8</sup> Neme oyae ogesi sa awa Adaa Aa ratulalo paliri mo mone akore i mi onaa page rabuawa wae pupitagi no aaya aa page rabunialia.
- <sup>9</sup> Niaana pape yaenu mada kone penaloa pulalo pema  
 pare Adaa Aa nipumi niana pamulalo pema yae adoa maredepo yaaya.

- <sup>10</sup> King pia aa mudumi Adaa Aa-me laketa agaa  
onaame pagenalo laketa rabu pageme.  
Koso pagoa mo agaa mea rumape raburi ora  
epe redepone koso pagoa mea rumaalia.
- <sup>11</sup> Adaa Aa-me oyae waru mua epe-rupa redepoya  
rumainalo kone raapu kata.  
Goa pua nimumi onaanu makirari napinalo  
peā.
- <sup>12</sup> Aa mudu king piame wae pupitagi kone luabu  
gimoa epe redeponea pinalo peme.  
Gore mo gavman pimi aanumi epea palimi  
raburi nimu puri mua epe-rupa pitimi.
- <sup>13</sup> King nipumi ora agaa ria-teme onaa raaname  
omēa.
- <sup>14</sup> King nipumi aa meda raatu yawaliare go aa  
nipyu tumaomalia.  
Go yapare aa meda nipyu epe kone i yaliare  
mo king nipumi epe kone mealia rabu lo  
robaa maepealia.
- <sup>15</sup> Gore king nipumi aa meda epe lo rabaa kaloa  
epea palia-re nipumi epe kone sua go aa  
epe-rupa mapiraalia.  
King-na peare yaa madaa i yai lopoaa suamaa  
ope-yaenu eta kata-rupa mada pea.
- <sup>16</sup> Neme epe kone makuae yae luabu mealiri gol-  
para silva go yaenu luabu ora rabuaniaye.

- <sup>17</sup> Epe onaanumi wae yae ratape gimoa waru adoa pameme.  
 Aa medame nipuna pora waru adoa epe-rupa pamualiare nipu ora epe-rupa piralia.
- <sup>18</sup> Wae pupitagi noa nena bi minasaawa ne apiyapa te-daare ne wae-rupa malopaalia.
- <sup>19</sup> Gore aa meda nipuna bipa nipu naara kone sua nipuna bi rabuaniaawa pitiare pupitagi ne aanuna raana meme kone page rabuaaya.
- <sup>20</sup> Aa medame ne mana-teade agaa waru aina madu pagoa piraliare ne epe-rupa pirali.  
 Aa medame Adaa Aa madaa kone rulaliare nipu raana adaa mealia.
- <sup>21</sup> Aa numi makuaeme. Aa meda nipumi epe kone waru makuaalia-re mo teme agaa waru rumaladalia.  
 Gore nipumi epe kone sua agaa epe-rupa ne aa yaliare aanu luabumi nipuna agaa pagolalo raana waru omalimi.
- <sup>22</sup> Gore aa meda nipu epe kone i yaliare go aa nipu ipa laipi kagaa pirape yae mua piri aa-rupa piralia.  
 Wae kone imi aanu-ri nimuna go pemeame wae maeyae aa piralia. Goa pua nipuna bipa nipu ma-oyaalia.
- <sup>23</sup> Epe kone i aa nipumi kone aba rumaawa epe kumapi agaa orope teme.

Goa pea-pulu nipuna agaa pagolalo raana  
waru omoa pageme.

24 Epe agaa-re ora epe redepi alubi apaa-para  
mena midi-lapome adea.

Nipu ora rede waru pua onaa luabu puri  
kata.

25 Aa medalomame nimuna pema yae luabu  
epeta kone sua pora pameme pare ota.

Goa pama-pama puare orope nimu omalimi.

26 Kogono peme nakinumi makuaeme.

Nimu kogono waru na palimare nimu eta  
diayalia kone sua kogono waru peme.

27 Wae au peme onaa luabu maoya tulalo pora  
rado rado asapeme.

Nipuna agaare repena sulaa ralae nona pua  
mo onaa luabu ma-oyaawa rabea.

28 Waea pi aame-re onaana rikiraane wae bomo  
agaa mea lopawa nimu yada-yada waru  
mapaya.

Makirae agaa-ta aame nipuna adami aanu  
raapu yada makepeaawa rugulala paya.

29 Yadapi aa-mere nipuna adapi aa omeme pua  
wae pora-para yola pea.

30 Aa medame aa meda-para ini adupi adupi  
paliare neme mada makuali mo aa nipumi  
waea pulalo pea.

Aa meda nипу agaa na-teare nipumi waea pulalo pea. Gore mo nipuna ratu yawe kone mубoa waea pulalo pea.

<sup>31</sup> Yomagae nimuna kama iri adoa nimumi aba makuaeme. Go yomagae aanu nimumi ora epe kone su epe pora rateme-pulu go kone mada kamaa aya kone-im.

Goa kone imi rabu nimu adaa bi meme.

<sup>32</sup> Ratu ora aipapulu nayawea aamere nипу epe kone sua pea. Go konere puri paloa yada wini peme-rupa mada.

Aa medame nipuna bipa nипу waru surubaliare ada kagure meda yada naminabaeme-rupa mada pea.

<sup>33</sup> Kaasa saadu teme aanu-miri akea palua pae loa kone aba meme.

Go yapare Adaa Aa nipumi nimuna kaasa saadu pemeare nimuna imi kone-rupa abuta.

## 17

<sup>1</sup> Aa medame nipuna ona naaki nogonu raapu lo-robaa padane sua piralimiri nimumi eta ragota page pa salimi.

Go-me mo adaa eta yawo neme onaa-me pemea page rabuniaya.

<sup>2</sup> Gore kogono naaki medame epe kone sua kogono palia rabu nipuna surube aana sিrupa piralia.

Mo surube-aana wae naaki nипу mo kogono  
naaki-na rolo-para piralia. Goa pua mo  
surube aa omalia rabu oyae nipuna nого  
naaki ruru raapu rumaalimi.

<sup>3</sup> Adaa Aa-me niaa wae aa yapae epe aa yapae loa  
rumaaadolalo pea.

Gore golo silva yapameadolalo repena egaapara  
iritimide-rupa niaa epeta pae ota pae  
lo adolalo pea.

<sup>4</sup> Wae agaa lo ipa awaalae agaa teme aanu nimumi  
mo nimuna wae agaa leape mada  
aane luyapainaloa waru pageme.

<sup>5</sup> Gote-me onaa raayo warisa. Aa medalomame  
naara aanu-para ero loa wae agaa temere  
nimumi Gote-para teme.

Aa medame aa yago medana kedaa rialia  
rabu raname omalia-dare go paliade pedome  
nipuna bipa nипу wae yoto mealia.

<sup>6</sup> Aa meda nипу ogae yalia pare nipuna akuaa  
naaki-nу piralimirи raana waru omalia.

Gore akolo ya? Gomere nimu adaa bi kata  
rabu nого naakimi nimuna agi aaraanu  
raname omeme.

<sup>7</sup> Epe kone sua agaa temere kone na-i aanuna  
agaa-rupada nateme.

Ora agaa riaare yaa agaa teme aanuna  
agaada dia.

- <sup>8</sup> Omeme pua waea pape madaa aa medalomame  
mone oyae meme pare nipumi aba adea.  
Go monere ona rakia nonapiane meapa yana  
kone sua nipuna raana epea-rupa ratea.
- <sup>9</sup> Aa medame nipuna adami aanu raapu epe-rupa  
pirano kone saliare nipumi aba pisade  
pupitagi pename namea salia.  
Aa medame aba pisade wae yaenu madaa  
agaa pamu teare mo aa nипу ratu yawalia.
- <sup>10</sup> Neme epe kone i aa meda raapu agaa maredo  
yaatalo palipiri agaa rana padane te rabu  
nipumi makuae yae aipapulu mealia.  
Go yapare neme wae kone i aa maredopo  
yatato pali-dare nипу kalaipu ma-epeali.  
Goa pali pare nipuna kone aipapulu na-  
epealia.
- <sup>11</sup> Waea pi aame-re yada papena agaa agu  
marekaaya.  
Goa pea rabu wae aa meda ipua nипу radaa  
waru pina talia.
- <sup>12</sup> Neme mena-beana si ripina mua mea epali  
rabu kiraa mena nипу poraania madaaliri  
ne epaa tu naalia-rabu adaa radaa nali.  
Goa palia pare aa meda epe kone nasua waea  
pulalo pea aa poraa adali rabu ne tu-nalia.
- <sup>13</sup> Gore nimumi aa meda epea pulalo paliri go  
aame wala wae yaeme abutea rabu oro

yalo nipuna onaa nogo naaki luabu wae-  
rupa pirualimi.

<sup>14</sup> Aa medame ratu yawe kone marekaliare ipa  
naaku robo sua ipa popenaloa poaya-rupa  
mada.

Goa palia-dare nипу gimoa waea naepalia  
rabu epealia.

<sup>15</sup> Adaa Aa-me go kone laapo gimi omea.

Pupitagi ne aa pa pirina teme page waeanu  
napi aa madaa pama kedaa mea kateme  
page gimea.

<sup>16</sup> Naaki meda epe kone nasaliare nipuna aalu  
waeame regepe ta-pulu nипу makuae yae  
mada namealia.

Gore mo aana alu regepetaga sukulu kabape  
mone wala akolo mea epenaya?

<sup>17</sup> Niaana adami aanumi oro yalo niaa raaname  
omeme.

Goa pua kedaa ritima rabu niaana keda  
rabamu ritalo nimumi managola pimi.

<sup>18</sup> Kone waru na-i aanumi aa medana yago ni-  
mumi abulalima loa nimumi mada na-  
abulape yapare pama yaa agaa teme.

<sup>19</sup> Waea pape madaa raaname omea aamere  
wala yada pape madaa raana omo yada  
marekaaya.

Go page aa medame nipuna bi minasaaliare  
go aa nipuna bipa nипу omape yae asapea.

- <sup>20</sup> Aa medame oro yalo wae kone su wae agaa agu  
teare nипу oro yalo epe-rupa mada napitia.  
Dia nипу wae-rupa agu pirualia.
- <sup>21</sup> Aa medana simi epe kone nasaliare oro yalo  
aaraa nипу lo-robaa keda mu aalia.
- <sup>22</sup> Lo robaa kuma pua raana piامere marasini  
noa epe-rupa pimi-rupa mada pia.  
Go yapare aa meda nипuna kone oyaliare wae  
yainame mo aa nипу ripinalia rabu uni-  
para yaina aawa maadapalia.
- <sup>23</sup> Waea pi aa nипу koso pagape yapidi medame  
pa laga taliare omeme pua kabe reke mua  
koso maoyaalia.  
Go pua nипumi mo koso ma-oyaatalo mone  
mua raaname waru omalia.
- <sup>24</sup> Waru makuae aamere epe kone page epe pora  
waru ratea-pulu nипumi makuaya.  
Go yapare waea aame epe kone naia-pulu  
oyae rado rado luabu pamu yota.
- <sup>25</sup> Aame wae maeyae kone rataliare go naakina  
agi aaraame lo robaa kedaa adaa mua  
nimuna kone-para oyalia.
- <sup>26</sup> Koso epe-rupa ta aa-para koso kabena temere  
gore naepeta.  
Aa mudunumi epea palaina nimu wala  
aipuyaame talimiri gore naepeta.
- <sup>27</sup> Makuae yae waru mea aamere nипу agaa bebo  
nata.

Epe kone i aamere aipapulu ratu yawape  
page gimea.

<sup>28</sup> Epe kone na-i aamere agaa loralia.

Go rabu onaame go aare epe kone waru-i aa-  
yana kone salimi.

## 18

<sup>1</sup> Aa padane nипу ode aawaliare nipuna bipa  
nipuna agu raapo kone-sua awalia.

Aa medaloma nimu epe redepone kone imi  
page pinawa kone ia.

<sup>2</sup> Epe kone nasu epea neape aamere mo epe pora  
epe kone meapere gimi omea.

Goa pua nipumi wae pupitagi pape pora  
ratuaya.

<sup>3</sup> Waea puaaya aamere aa yago medalomare  
naepe ta-ga pinawa kone ia.

Goa pua nimuna bi ma-oyaawa nimu yalaa  
waru ma-paaya.

<sup>4</sup> Epe kone i aame agaa tea rabu nipuna-ta agaa  
mada epe kone mealimiri go agaa epeta-da  
pageme.

Gore ipa naaku-para rubini popaa koyapape  
peade-rupa mada pea.

<sup>5</sup> Aa meda wae pupitagi noa koso madaa aaliare  
go aana koso rabamu laata ne napope.

Gore mo aa nипу koso mada nawini pina  
rabuaatape.

- <sup>6</sup> Epe kone na-i aamere pa onaa raapu yada agu pulalo pea.  
 Goa pua nipuna agaa pageme rabu otada nипу page tulalo peme.
- <sup>7</sup> Kone waru na-i aa medame agaa tea-dare nipuna go agaame nипу ma-oyaaya.  
 Gore nipuna maa-para yapa-lokena pogaa mada sua maraawa nипу omalia.
- <sup>8</sup> Aa medana maa agaa paema rabu go agaa pagape madaa raaname waru omeme.  
 Go agaare epe redепи-rupa meda yapulu aipapulu pagoa eta mada mea neme.
- <sup>9</sup> Wae kiaa rakepene aare nimuna bipa nипу ma-oyaya.  
 Goa pua nimu kiaa rakepea wae-rupa pimi.
- <sup>10</sup> Adaa Aa-re puri pabe ada-rupa aaya.  
 Epe redepone aanu nimu go adapara aloma puua gopara pua piruaeme.
- <sup>11</sup> Amone aanu nimuna moneme nimu kutapua ora epe-rupa surubalia kone imi.  
 Mo ada kagure puri-palo aya-rupa mada kone imi.
- <sup>12</sup> Gore aa meda nипу pupitagi noa nipuna bi minasaliare orope nипу oyalia.  
 Nena bipa ne rabu aniaawa epe pora narataliri ne epe adaa bi mada nameali.

- 13 Aane waru lobapaina pirua agaa aba waru  
pagoa orope agaa abulape.  
Neme goa napaliri wae maeyae kone sua pe-  
pulu orope ne yala pote.
- 14 Aa meda nипу yaina omoa yapare kone puri  
paboa piraliare go yaina mada perekealia.  
Mo aa nipuna kone oyaliare go aa nipuna  
kone wala akepua ma-epeaalia pae?
- 15 Aa meda nipumi epe kone sua nipumi oyaе  
rado rado waru makuaatalo pea yae luabu  
waru makuaaya.  
Go page aa medame agaa mana teme rabu  
nipumi aane lobapa ina pirua mogo agaa  
rayo waru pagea.
- 16 Gore neme adaa aa meda raapu agaa talo pali-  
daare neme nипу pa ode kalape yae meda  
aba ripinape.  
Go pali raburi neme nипу mada adali.
- 17 Aa meda nипу kosona ini-agaa madaa aawa  
agaa teare nипу koso wini pape nonapi-  
aene agaa tea.  
Go yapare pa aa meda agaa waru maredepo  
yainalo agaa mealia-dare go koso apimi  
wini palia palo marea.
- 18 Aa laapona rikiraane koso aapimi ora wini  
palialo abi nalapaeme raburi apimi wini  
palia pala marea teme.

**19** Nena ame meda wae kone saliri nipumi go kone mea rogasua ne raaname namalia. Gore onaa medalome mo ada kagurena pora gape poaeme-rupa mada nimu runane pope-rupa maralimi.

Gore mo aa lapo nипу yada pape agaa loa ki namealipi. Nipuna lo robaa padane-para mada nasalipi. Adaa poragape garulaawa aana kerepo pora rugutade-rupa mada. Goa palipi-pulu nипу ada runane mada napalia.

**20** Neme agaa epe-rupa loa redepone-rupa te rabu nena lo robaa-para raana waru palia.

**21** Nena tede agaame onaa epe-rupa mapiraali. Nena agaame agu onaa ma-oyaawa onaa maepeaalia.

Goa pe-pulu neme epe agaa lape madaa raname omalimi ne epe-rupa mada pirali.

**22** Neme ona meda rumali-daare gore ora epealia. Goa paliri Gote-me page lo robaa gua epeta kone salia.

**23** Naraame amope oyae pawa agaa mea. Go yapare aamaame agaa puri palo loa abuta.

**24** Gore aa meda nипу adami aa adaapu aaliare go aa nипу oyalia.

Go yapare aa meda nипу adami aa ora epe rado piaene meda alipiri go aa lapo nипу

lo rabaa waru sua nипу lapo ameaya-rupa  
alipi.

## 19

- <sup>1</sup> Aa meda nипуми papea namakuaawa yapare  
pama kalaipu kogono paliare ini namadi-  
aalia.  
Aa medame kogono aipapulu palia pare go  
kogono ora epe-rupa mada napalia.
- <sup>3</sup> Gore onaa luabumi nimuna bipa waea pua  
nimumi Adaa Aa kedaa kaloa wala ratu  
yaweme.
- <sup>4</sup> Aa meda nипу mone adaapu saliare nипуна  
adami aa page adaapu aalimi.  
Go yapare aa meda nипу mone nasaliare mo  
nипуна adami aanu adapu napitimi.
- <sup>5</sup> Gore aa medame yaa agaa loa koso teare nипуми  
wae yoto mealia.  
Goa palia rabu nипу mada napogla palia.
- <sup>6</sup> Gore aa adaapumi aa mudu pimi aanu omeme  
waru peme. Goa pua nипуми nimu raana  
omenalo.  
Oyae pama kane aanu raana omoa go aa  
nипуна adami aa kone imi.

<sup>7</sup> Gore aa medaa nипу oyaе diayalia rabu nипuna amenume page go aa gimeme. Goa peme rabu nипuna adami aanumi page mo aa maasa rilaawa gimeme.

Nипу reparа omeme-pi agaa-ta pare nипuna agaa ini namadini pa rasatapa ia.

<sup>8</sup> Aame nипuna bipa epe-rupa piralua kone suare epe pora-para makuae yae mulalo puri waru paloa epe kone meape madaa kogono palia.

Aame makuae yae mua epe konena pora rataliare nипuna epe-rupa pirape yae mua epe-rupa piralia.

<sup>9</sup> Go yapare aa medame koso loa yaa agaa tea-daare nипuna tea yaa agaa mada wae yoto ora mealia.

Go piaene yaa agaa ne aare tumaomalimi.

<sup>10</sup> Epe kone na-ia aa nипumi mone oyaenu adaapu su aayare na-epeta.

Naara piri kogono naakimi mo aa mudu wala surubea page ora rado yade.

<sup>11</sup> Epe kone i aa nипumi kone gupa ia. Nипу epe kone ia-pulu ratu ratu yawape kone aipapulu naia.

Goa pua aa medame nипу-para waea pea page gimea.

<sup>12</sup> Gore mena kiraа-me e waru loa aa mudu king pia aa ratu waru yawea.

Go yapare ratu yawe onaa rabamulalo  
paliare yai ipua maapu-para eta naape yae  
ma-opaaya-rupa mada palia.

- <sup>13</sup> Naaki meda nипу ере коне наслиаре го  
наакими нипуна аараа кедаа waru mea  
kata.  
Gore aa medana oreme ratu yawoa agaa  
adaapu loaliare nipuna ada runane itipata  
pabea-rupa tea.
- <sup>14</sup> Niaana aama aapanumi mone oyaenu rumaa  
gialimi  
pare Gote nipumi epe kone i ona mea galia.
- <sup>15</sup> Kiaa rakepene aanu nimu oro yalo pama piru-  
aawa reaeme omoa u keme waru loa patala  
pu aaeme.
- <sup>16</sup> Aame Gote-na pora ratua epe-rupa pitiare  
naoyalia pare nипу ora epe-rupa piralia.  
Go yapare aame Gote-na epe kone madaa  
masa rilaawa waea-nu paliare nипу oma-  
lia.
- <sup>17</sup> Gore neme aa naara meda odome-omoa oyae  
katalo pali-daare mo Adaa Aame ne madaa  
rudu ainalo pe.  
Goa pali-daare orope Adaa Aa-me nena rudu  
go abutea.
- <sup>18</sup> Gore nena naakimi waea pua pupitagi naliare  
neme nena naaki mana лape. Mana te

raburi nipumi epe pora ratalia.

Go yapare neme mana lake pupitagi pa  
nalaaina gimaliri gore nena naaki riaa om-  
enawa kone sua pe.

<sup>19</sup> Gore aa medame rono omoa nipumi waea  
paliare nipuna go wae yaena yoto mulalo  
pea.

Go yapare neme nипу rabamua nipuna  
keda mea riali-dare wala orope page nипу  
rabameaina kone agu sua palia.

<sup>20</sup> Go yapare aa medame ne maredepo yawoa epe  
kone gina kone sali-dare orope ne epe kone  
waru mealii.

<sup>21</sup> Aame kone adaa pua sua oyaе adaapu palua  
kone ia  
pare Adaa Aa-me pina kone ia-rupa luabu  
mada palia.

<sup>22</sup> Aanumi goa loa lo rogaa i agaa madaa puri palo  
aaeme. Gore naraa aa apere ota pare pa  
epeta.

Go aa epe-yaliare mo yaa agaa ne aa ora  
rabuniaaya.

<sup>23</sup> Ne Adaa Aa-na rolo-para piralidare ne epe-rupa  
pirape yae mea gialia.

Goa palia rabu ne madaa wae yae meda na-  
epalia rabu ne oro yalo epe-rupa mada  
pirali.

**24** Kiaa raakepene aa nипу ki arota-para pagoa pa  
pirualiare mo eta yawo i meape yala potea.  
Go page kimi musaawa eta mea nepe page  
yala potea.

**25** Wae pupitagi ne aa aipuyame tali-daare kone  
waru na-i aame adoa mada makuaalia.  
Goa palimi rabu epe kone aba ratua palia.  
Go yapare neme epe kone sua aae aanu  
maredepo yali rabu nimuna makuae yae  
ora madaa popalia.

**26** Naakimi aara ratu yawoa nipuna agi ada-para  
pane rata saliare  
mo nipuna onaa nogo naaki rayo yala mea  
kataa.

**27** Naaki neme epe agaa waru gimaliri kone nai  
pa maeyae aanuna kone ratua ali.

**28** Waea-pi aame koso witnes pulalo epaliri go aa  
nipumi mo koso ma-oyapena epea.  
Go aa nипу mada waea luabu rubita.

**29** Wae agaa lo wae pora pameme aanuri nimu  
wae yoto mealimi.  
Goa pua wae pora ratua pupitagi neme aanu  
nimu aipayame kudu talia.

## 20

**1** Aa-me ipa bia adaapu noa wae agaa adaapu lo  
yada marekaawa agaa adaapu tea.

Goa pua mo ipa biame nипу surubena teare  
epe kone nasalia.

<sup>2</sup> Aa mudu king nipumi ratu yawoa puri pane  
agaa ta rabu onaa paala ma-saaya. Gore  
mo kiraan mena laiyono-me buai ta-rupa  
mada king-mi goa pea.

King nипу raatu mayawaaliri nena kagaa  
piraama lama pope kone wasupa alupalia.

<sup>3</sup> Aa medame yada pape kone gimaliare nипу epe  
bi mealia.

Go yapare epe kone na-i aamere oro-yalo  
yada pape agaa agu loaalia.

<sup>4</sup> Kiaa rakepene aame eta wai poape yapi di rabu  
maapu su naweare kiaa rakepe pea.

Eta naape yapidi rabu naape awolalo pea  
pare nипу e napoae aame maapu-para  
pama asapula pea.

<sup>5</sup> Aa-na konere ipa ini adaa naaku piade-rupa  
mada yade.

Aa meda kone waru makuae aa yaliare go  
kone ora so mada popea.

<sup>6</sup> Aa adaapumi nimuna adami onaa raaname  
omema lo gupa teme.

Go yapare aa medana adami aanuri padane  
padane laatapu aalimi.

<sup>7</sup> Gore aaraa ora epe kone sua epe pora ritua  
piralia rabu nипу sinumi raana omalimi.

- <sup>8</sup> Gore aa mudu king nipumi koso pagolalo pea  
raburi mo kaso ta epeme aanuna kone  
waru adoa rumaaya.
- <sup>9</sup> Niri Gote-na ini-agaa mada ora epe redepone aa  
awayolo aapimi mada tea pae?  
Goa pua neme wae yae meda napawa teme?
- <sup>10</sup> Onaanumi oyae kabeno pare aa medame  
makirae agaa tea-daare  
Adaa Aa-me go kone adoa rumaamina.
- <sup>11</sup> Niaame naakinu aba adoa rumaema nипу epe  
naaki nипу wae naaki lo.  
Go rupa agure niaana naakanuri aba adoa  
makuaema.
- <sup>12</sup> Adaa Aa-me niaana ini mariayare oyae ada-  
monalo pisa aane ma-saare agaa pagomon-  
alo pisa-ga waru adamina.
- <sup>13</sup> Ne oro yalo u-pati aa yaliare mone oyae diay-  
alia rabu naara pirali.  
Go yapare ne aipapulu rekoa kogono pali-  
dare nena maapu-para eta oyae adaapu  
sali.
- <sup>14</sup> Aa meda oyae kabolalo pea pare mo yaena yoto  
ora adaa pea rabu nipumi agaa adaapu ta.  
Mo yae aba kaboria pua nipuna adami aanu-  
para gupa pua ta. Go yaere mone ogesi pe  
yae meda kaboa mea ipulu ta.

**15** Epe kone imi onaana agaa teme raburi pa aa medalomana golo rabuaeme.

**16** Gore aa medana yago nipumi pa aa medana rudu abulalua agaa loa yapare wala na-abuteadaare waea pea. Gore nipumi epea go napea-daa.

Gore aa-me go piaene agaa meda teadare neme oyae meda mo rudu abune nona pina ora meape.

**17** Yaa agaa loa mua ne etanuri rede pi eta meda kone i pare oropere go paake ne etare wae yae yana kone sali.

Go mea ne etare nena agaa peto-para ipa mrupa kilulu tea.

**18** Neme epe kone aba mealiri orope nena palide kogono epealia.

Nena yada-lore aa raapu yada pulalo pali-daare neme yada akepu palua palo kone waru niminaawa pape.

**19** Aa meda yago mada maa agaa pawa yaa agaa ne aa raapu ne ada mua naape. Goa pua neme kudiripi agaa meda lakete rabu wala mo aa meda pua lakeloa laame tea.

Aa go-rupa teadare gipia.

**20** Aa medame agi aaraanu wae agaa teare go aa nipu ora omalia.

Gore laba ribaane-para udinita-rupa mada palia.

- 21** Aa medame agi aaraa lapo pa pirina nipuna moae luabu aba mealiare go oyae luabu epe-rupa mada nasalia.
- 22** Aa medame ne-para wae paliare neme nipuna wae-yae abi na-abulape.  
 Dia Adaa Aa-me ne raba mealiaga nипу kone rulape. Goa paliri rabu nena keda luabu diayalia.
- 23** Aame oyae kabeno ruma sua yaa agaa tere  
 Adaa Aa-me go mada raaname naomea.
- 24** Adaa Aa-me pora luabu niaa go su-amaa pa piramona aba maredepoya saaya.  
 Go pora-re aapara pea palo niaa akepua mada makualiam yae?
- 25** Adaa Aa nипу Gote opa kalape yaere kone aba maarekawa sape.  
 Neme go opa kaloa aipapu te pare wala orope kone adaapu sali. Neme goa pali-dare nena bipa ne go mabebolaeyae.
- 26** Epe aa mudu king-mi waea peme onaana koso pagoa nimuna wae-yae adoa rumalia.  
 Goa pua nimu keda waru katea.
- 27** Niana kone wasupa Adaa Aa-me gisare wae oyae waru adoa rumaawa piramonalo laba paa-rupa niaa madaa mapirasa.  
 Gore epe yae gore wae yae lo mada rumawa ado kiritalima.

- <sup>28</sup> Go yapare king nipumi nipuna onaanu madaa  
      epea agu pua odome omea.  
Go paliadaare king nипу epe-rupa pirua nипу  
      ora adaalupu pirualia.
- <sup>29</sup> Niaame ogegeaanuna puri ado epeta kone ima.  
      Goa page yomagaenu kama iri adoa nimu  
      adaa bi kateme.
- <sup>30</sup> Aa medame wae palia rabu neme nипу  
      aipuyame kudu tali rabu nipuna wae yae  
      mada gimalia.  
Goa pua nипу ora epe aa piralia.

## 21

- <sup>1</sup> Adaa Aa-me aa mudu king-na kone maredepo  
      yaaya rabu king aa mudu nipumi Adaa Aa-  
      na raana ratea.  
Go rabu nipuna epe konere kuba rupara ipa-  
      rupa popea.
- <sup>2</sup> Niaana pema yae luabu ora epeta kone ima pare  
      Adaa Aa nipumi niaana ima kone luabu  
      aba rumaa adea.  
Goa pua nipumi niaana ima kone raayona re  
      ado-kiritea.
- <sup>3</sup> Niaame epe redepone kone agu ratua Gote  
      nipuna ini agaa madaa epe-rupa pируам-  
      ина.  
Goa palima-daare niaame opa katema yaenu  
      page rabuaniaaya.

<sup>4</sup> Waea peme aanumi aakone sua oro yalo wae  
pupitagi agu noa waeanu agu pulalo peme.  
Oro yalo nimuna pirape yae oyoa wae yae  
rubini onaa pimi.

<sup>5</sup> Kogono peme aanu nimumi epe kone waru sua  
kogono peme rabu oyaenu waru adaapu  
imi.

Go yapare kone waru nasua pa aipapulu  
bebo teme aanu nimu oyae diata yalia rabu  
wae-rupa pitimi.

<sup>6</sup> Aa medame yaa agaa loa nipumi mone yoloa  
mu-aaliare gore nипу omape pora-para go  
pu aaya-da.

Go aa-na saliade oyaere moae aipapulu sua  
wala esepe tade-rupa mada yalia.

<sup>7</sup> Waea pi aanu nimumi wala epea meda napeme.  
Go peme waeame nimu luabu dia yalimi.

<sup>8</sup> Wae kone i aamere wae pora agu ratea.  
Go yapare aa medaloma epe kone imi-numiri  
waea napeme.

<sup>9</sup> Aa meda nipuna ada gaa-para pawa pirua ona-  
nogo naki raapu pawa piralia-daare epe ta.  
Pare nипу agaa wae adaapu ne ona raapu  
piraliare oyalia.

<sup>10</sup> Waea pape madaare reaeme omema-rupa  
mada pea-pulu waea adaapu pape mada aa  
meda odome naomeme.

11 Epe kone naimi aanumi adenalo mo waea  
pupitagi ne aanu tu adialimiri mo rudu  
kone sua pimi aanumi adoa epe kone meal-  
imi.

Goa pua nimuna makuae yae ora adaa yalia.

12 Adaa Aa-na kone ora redepone kone ia. Goa  
pea-pulu aanumi nimuna ada-para waea  
peme luabu Adaa Aa nipumi waru adoa  
makuaaya.

Goa peapulu Adaa Aa-me go aanu nimu lu-  
abu maoya-talia.

13 Naraame-ome aanumi nimu rabaminalo  
yatemedi agaa napagali-miri orope ne  
yatede agaa mada napagalimi.

14 Gore aa medame ne ratu yawaliare neme oyae  
ode medaloma go aa nipu kalape.  
Ne kudiri pua ne naadalimi rabu nipuna ratu  
mada dia yalia.

15 Gore onaanumi epe pora ratua epe kone sua  
koso eperupa peme raburi epe-rupa piri  
onaame adoa raaname omoa pedo palimi.  
Mo waea peme onaame goa adoa nimuna lo  
robaa-para wae kone meme.

16 Aa medame epe kone sape gimoalia  
pare nipu omoa paliare aba omoa puua pimi  
onaa raapu puua piralia.

- <sup>17</sup> Aa medame epe eta noa oro yalo ipa waene  
noa raaname omo-aaliare nipuna amo dia  
yalia.
- <sup>18</sup> Epe aanu madaa keda popolalo palia  
pare wala pereketua mo pupitagi no aeme  
aanu madaa alopawa popalia.
- <sup>19</sup> Gore aa meda eta oyaenu waru naope-pare  
awaliare epeanu luabu rabuaaya.  
Goamere ona ratu yawo agaa adaapu ne  
onanuna kone page rabuniaaya.
- <sup>20</sup> Epe kone su epe pora ratua piri aana ada-para  
oyae ora epe-rupa pa su-aaya.  
Go yapare wae kone su wae pora pameme  
aanuna oyaee diata rabu pa piru-aaeme.
- <sup>21</sup> Go yapare aa medame aa yago raaname waru  
omoa epe pora rataliare nипу raana rubia  
adaa bi kateme-pulu epe-rupa piralia.
- <sup>22</sup> Yada yame pi aanu epe kone katea rabu ada  
kagure meda mada pabo tua winipu meal-  
imi.  
Aanu nimuna ada kagure pape ora puri patapulu  
nimuna ada kagurena pape mada  
narasaralimi. Mo yada pi aanu yada pula  
palimi rabu ada kagure pabo tu rubalimi.
- <sup>23</sup> Gore aa medame nipuna agaa-abulu waru  
suruboa aaliare go aa nипу madaa kedaa  
meda mada naepalia.

- 24** Wae pupitagi ne aakone su aame waea pua aa  
yagonu-para page wae agaa teme.  
Goa pua oro yalo nipuna bi agu minasaatalo  
pea.
- 25** Kaa rakepene aa nипу kogono napi pa oyaе  
meape madaa aaya.  
Goa peapulu nipuna raana omea koneme  
nипу tumaomalia.
- 26** Kaa rakepene aame oro yalo oyaе pa meape  
madaa kone su pia.  
Pare epe kone i aamere nipuna oyaе pa aanu  
katae.
- 27** Adaa Aa-me pupitagi neme aanumi kateme opa  
re raanamē na-omea.  
Go yapare makirae konena opa epa katemere  
gore Adaa Aa-me pugu pia kone ia.
- 28** Gore koso-na yaa agaa tere go aa omalia.  
Go yapare aa medana agaa waru regena  
pagoa go pi aanumi go aana agaa pagape  
madaa raana waru omoa pagalimi.
- 29** Waea adaapu peme aanu nimumi epea pema  
kone sua waea adaapu peme.  
Goa pea pare epe redepone kone imi aanu  
nimuna pora pamuapere epena kone imi.
- 30** Pinawa ne ora epe kone makua yae i page epe  
pora kurua oyaе luabu sali pare gomere ne  
mada naraba mealia.

Adaa Aa madaa kone mapirali-dare pora  
mada pali.

- <sup>31</sup> Gore mo yada-pi aanu nimuna yada pu-  
lalo nimuna ose mena maredepo yaawa  
maaeme.  
Pare Adaa Aa nipumi go yada-na puri  
nakateare yada nawini palimi.

## 22

- <sup>1</sup> Gore onaame ne ora epe aa kone sua adaa bi  
gialimi-daare gomere mone oyaee adaapu  
imi aanu page rabuaniaye.
- <sup>2</sup> Adaa Aa-me amo page naara onaa page luabu  
nipumi warisa.
- <sup>3</sup> Epe kone sua redepone-rupa piri aame waeanu  
nipyu madaa epea rabu nipumi pakeaaya.  
Go yapare epe-rupa napimi aanuri nimu  
pimi-para waeanu epea rabu nimumi go  
kedaa mua mea ritimi.
- <sup>4</sup> Neme nena bi rabuaniawa ne Adaa Aa-na rolo-  
para pirali-daare ne mone oyaenu page  
adaapu sua epe-rupa pirali.
- <sup>5</sup> Aa malopawa ma-oyaya yaere wae pora pamua  
pea.  
Aa meda nipyu epe-rupa aapena niminaaliare  
waea pape pora pakeaya.
- <sup>6</sup> Nena nogo naakinu epe pora ratina agaa maana  
mogeape.

Goa paliri nипу go pora rataama pua nипу  
pua ogae yalia.

<sup>7</sup> Mone imi aanumi naraame ome aanu nimumi  
kogono kaloa surubeme.

Aa medaloma yago meme-nuri mo yago  
meme aanuna kogono pama kogono pu  
saeme.

<sup>8</sup> Gore aa medame pupitagi noa aa medaloma  
madaa wae yae nипу madaa epalia rabu  
nipumi pa aa meda-para wala waea meda  
mada napalia.

<sup>9</sup> Adaa Aame mo pa piri aanu rabameme onaare  
oyae waru kata.

Gore akolo ya? Naraa piri aanu rabamua  
oyae kateme-daa pea.

<sup>10</sup> Waea pi aakone aanu luabu ratu talimi rabu mo  
aa nimuna pemeanu rayo dia yalia.

<sup>11</sup> Aa medame epe agaa loa Gote-na ini agaa  
madaa epe-rupa aayare gore mo aa mudu  
king-na adami aa piralia.

<sup>12</sup> Adaa Aa-me epe makuae kone luabu waru  
suruboa mo yaa agaa ne aanuna yaa agaa  
luabu rabuaniaya.

<sup>13</sup> Kiae rakepene aa nipuna ada-para pama pirua  
nipumi gupa ta.

Ni amaa palua rabu raa mena laiyonme po-  
rania ni tu nalia ta.

14 Ona yolape kone saliri naaku-rupa lopo talia.  
Gore Adaa Aa ratu onaa madaa yawaliare go  
naakupara mada lopalimi.

15 Nogo naakimiri maeyae aanu adaapu peme.  
Goa palimi pare neme mo nogo naakinu  
nimu aipuyame tua mana te-daare go pal-  
imide waeanu luabu mada gimalimi.

16 Aa medame naraanuna oyae mulalo waea  
palia-dare go page mo amo ne aanu oyae  
ode kateadare go paliame nippu aa naraa  
piralia.

*Epe kone i aa-me agaa 30-pela redepona tua isa.*  
*(Pro 22.17–24.34)*

17 Abiare epe kone imi aanuna epe makuaeyae-  
para epe redepone yae luabuna agaa la-  
giano waru pagalepa.

18 Gore neme go agaa pagoa nena kone-para  
rubialia raburi neme mo onaa medaloma  
lakeloa mogeape.

Goa paliri nena lo robaa raana rubialia.

19 Nena bipa pagainalo go agaa apo lagialo-daa.  
Goa pua neme Adaa Aa madaa puri paboa  
kone waru rulainalo pea.

20 Neme go agaa 30-pela epe redepona tisudere  
ora epe kone gua makuae yae meainalo  
gisude.

21 Goa pea-ga neme ora agaa luabu waru  
makuaaina.

Goa pua aa medalomame ne-para ora redepo  
ne agaa pua asapa teme-daare mada pua  
meali-ya?

**1**

<sup>22</sup> Neme go aa naraanu pa ora naraanu yade kone  
nasape. Goa pua neme nimuna oyaenu  
page pa yoloa nameape.

Goa pua nimu koso talo epalimi rabu nimuna  
koso maoyaawa namabebolape.

<sup>23</sup> Gore akolo ya? Adaa Aa-me nimu adabaawa  
surubalialo lalo.

Go page aa medame naraa aanu-para wae  
palimi-dare Adaa Aa-me nimu-na waea  
mada abutea.

**2**

<sup>24</sup> Neme ratu repara yawo agaa pa yola piriri pi  
aanu raapu na ada mu aape.

<sup>25</sup> Nimuna pemea ne mada palia rabu orope go  
waeana-mi ne ma-oyalia.

**3**

<sup>26</sup> Gore aa medame rudu mua nipuna bipa mada  
na-abutea-daare neme abulalua pi nalape.

<sup>27</sup> Neme mo-rudu abutoa loa mada naabute-  
daare nena oyae luabu-para pati reke page  
madaa epa mealimi.

**4**

<sup>28</sup> Nena akuanumi abade su robo isimi-rupare  
wala meda neme yola monea nasape.

**5**

<sup>29</sup> Gore aa medame epe kogono paliare nипу aa  
muduna kogono aa mada piralia.

Go piaene aa-re pama bi na-i aa medana kogono mada napalia.

## 23

**6**

<sup>1</sup> Ne adaa aa meda raapu pirua eta no pirali-daare ne pa mo gialia eta madaa kone sua pirali.

<sup>2</sup> Go page ne eta ora adaapu ne aa yaliare nena lo robaa rabuaniaawa gimape.

<sup>3</sup> Neme mo aa muduna eta madaa ora pea kone nasape.

Neme mo eta madaa omeme pali rabu aa adaa nipumi raana naome aanu medaloma palilo lagialo.

**7**

<sup>4</sup> Ne mone orae amo aa mudu pirano kone sua kalai ogeapu pape.

Gore ne mada epe kone piralia-dare goanu napape.

<sup>5</sup> Neme mone adaapupe sali pare go mone ora aipapulu dia yalia.

Gore mone nippu yaa-itaa madaa popaa maawa riyaa palia rabu ne ipa ripi ralia.

**8**

<sup>6</sup> Oyaenu narumaae aa raapu eta padane-para nanape.

Nipuna gialiade eta agu nolalo kone nasape.

<sup>7</sup> Go piaene aa raapu eta nali-dare mo aame ne gupa lagialia. Eta ipa oyae luabu apo iaga nena raana palia-rupa aipapulu nabape tea.

Goa tea pare ora agaa-da nata ne eta nali-rupare aba gupa nalialo nipuna kone-para makuaaya.

<sup>8</sup> Goa pua neme eta no kiritua aana pea luabu ado kirituare mo mea nalide eta luabu wala maaku ratu rubali-ga mo tede omeme pi agaa page puri napaloa ini namadialia.

<sup>9</sup>

<sup>9</sup> Aa meda kone epe-rupa nasalia raapu neme agaa nalape.  
Neme epe agaa nипу lakete-dare go agaa pa sa so lalia.

<sup>10</sup>

<sup>10</sup> Ora abade su robo isimidere neme wala yola-monea meda nasape.  
Neme agi aaraanu aba ome onaana su page nameape.

<sup>11</sup> Adaa Aa-re amame padane-para madini nona pi aaya-pulu mo nogo naakinu rabamealia.  
Goa pua nipumi puri adaa mua raba mulalo puri waru paloa koso madaa page rabamulalo pea.

<sup>11</sup>

<sup>12</sup> Gore ne agaa mana lagialoga go agaa mana waru pagoa makuape.  
Nena aane waru luyapa-ina pagoa go agaa waru makuaaliri epe yae rayo waru makuaali.

<sup>12</sup>

<sup>13</sup> Neme nogo naaki tua kuma mapape madaare paalame naomape.

Neme agaa mana loa tali-daare nипу na-omalia.

- <sup>14</sup> Dia neme goa pali raburi maredepo yali-daa nипу ome onaana su-para mada napalia.

### ***13***

- <sup>15</sup> Naakinumi epe kone-para epe makuae yae mealimi rabu nena pu robaa-para page ora epealia.
- <sup>16</sup> Neme nena epe redepone agaa pagape madaare raana ora waru pea.

### ***14***

- <sup>17</sup> Neme waea peme aanuna pemea adoa epame na-omape.
- Oro yalo neme Adaa Aa madaa raana omo pirua kone sape.
- <sup>18</sup> Neme go pora ratu pirali-dare nena orope pirape yaere ora epeaalia.
- Goa puare ne page ora aipapulu mada na-omali.

### ***15***

- <sup>19</sup> Naa naakimi naa agaa pagoa epe kone mea.
- Goa puare nena pora pamuali-rupa pawa adoa pamuape.
- <sup>20</sup> Nere ipa waini-para eta ora adaapu neme aanu raapu padane-para napamuape.
- <sup>21</sup> Ipa bia-para eta adaapu neme aanu nimu ora naraa piralimi.
- Go yapare aa medalomame pa ipa agu noa upatu piraliare nimu mamina riripipape pi yamoa piralimi.

### ***16***

- 22 Nena aapame ne maopasa-ga nipuna agaa waru pagape.  
 Nena aama page ogae yalia rabu ne ora waru yae-da kalape.
- 23 Neme ora waru puri paloa epe kone-para epe kogono pape-para epe makuae yae meape madaa puri paloa kogono pape.  
 Neme go epe kone narubape.
- 24 Gore aa medame epe kone sua epe pora ratalia-daare nipuna aaraame go naaki madaa raaname ora waru omea.
- 25 Neme go agaa pagoa epe pora luabu ratali raburi nena aama-aapame ne ora epe ta loa adaa raaname omoa pedo pedo waru palipi.

**17**

- 26 Go naaki neme nina kone ora waru adoa naa agaa pago pirali-daare epe yae luabu adaina.
- 27 Wae paake aa rume onare ipa naaku medarupa yapulu go-para lopoladere pua omaalimi.
- 28 Go piaeene onanuri paake ne aanumi pemederupa surubaeme-ga waru adalepape.  
 Nimumi aa adaapu rumeme rabu aaninumi gimeme.

**18**

- 29 Aa apimi kedaa naloa nipuna bipa odo omea pae?  
 Aa apimi agaa adaapu loa yada marekaaya pae?  
 Aa apina to madaa rere pia pae?  
 Gore apina inipara ora ka-nea loa ayapae?

- <sup>30</sup> Go aanu luaburi oro yalo ipa bia-para wain  
lapo noa maeyae aanu yade.
- <sup>31</sup> Mo wain nипу ере pepena pua ranapi yae  
saliare nena kone-para ora mea gi tea  
gimape.  
Nena peto-para page mea nali rabu rede-ora  
waru palia.
- <sup>32</sup> Wala ekeraa ribareko raburi paaka wae  
medame onaa nalade-rupa mada palia.
- <sup>33</sup> Gore nena kone luabu ora oyalia rabu neme  
oyae rado meda ade nona palia.  
Neme goa pua makirae agaa adaapu te.
- <sup>34</sup> Goa pua ne pate raburi ipa sipi mo solowara  
mada pulaina so sipina ini kadu madaa piri  
nona palia.
- <sup>35</sup> Goa pua neme gupa te.  
Ni tamede pare radaa napea te.  
Gore akolo ni narekawa ipa meda wala  
nanowaya?

## 24

<sup>19</sup>

- <sup>1</sup> Neme waea pi aanuna kone madaa raaname na-  
omape.  
Go waea pi aanu raapu pamuape page  
gimape.
- <sup>2</sup> Nimu waea pape agu niminaaeme.  
Goa pua nimumi oro yalo wae pupitagi yada  
papena agaa agu teme.

<sup>20</sup>

- <sup>3</sup> Aa meda nипу ере kone su epe makuae yae  
raapu piraliadare nипу ora epe ada-rupa  
pu patea.

Goa pua nipuna ona nogo naaki raayo puri  
paloa piralimi.

- <sup>4</sup> Go piaene aa nipumi yoto adaapu pe yaenu  
kaboa nipuna ada-para marubia salia.

### 21

- <sup>5</sup> Aa nipu epe kone sua epe makuae waru rubina  
aaliare go aa nipu ora puri pabe aa alia.

Goa pua nipuna ada kagure page puri waru  
mapabalia.

- <sup>6</sup> King medame ada kagure medapara piri king  
meda raapu yada pulalo paliare mo epe  
kone sua makuae aanu madaa kone aba  
mealiare goa ora epelia.

Goa pua mo yada papena mana page agaa  
aba waru minaawa yada waru makuae aa  
adaapu salia-daare mogo pulalo paliade  
yada ora nipumi mada wini palia.

### 22

- <sup>7</sup> Epe kone-para epe makuae yae laapo-re ora  
madaa ia-pulu epe kone na-i aanuna kone  
luabu rabuaniaaya.

Go yapare aanumi agaa adapu teme rabu  
agaa kone nasapimi aanuri pa agaa lo-  
raawa piruaeme.

### 23

- <sup>8</sup> Waea pape mada agu kone niminaalia aare nipu  
pupikagi nape aa yade teme.

- <sup>9</sup> Wae kone imi aanuni oro yalo nimu wae  
pupitagi nape kone agu niminawaeme. Go  
pemea luaburi waeana re luabu yade.

Aanumi ademe raburi nimu ora wae aanu-  
rupa ademe.

**24**

<sup>10</sup> Gore wae yapi-di meda ne alalia rabu nena uni  
omapaawa ne ora puri ogesi-da page meda  
ora nasalia.

**25**

<sup>11</sup> Gore koso-me rumaawa aa meda wae naapea  
pare tumaomatalo palimimirri neme go aa  
wala puua raba meape.

<sup>12</sup> Neme apo yaere niaana ya-daa dia pi nalape.  
Adaa Aa-me ne ora waru suruboa nena oy-  
aenu page waru rumaa gu aaya-ga adape.  
Goa pua neme go agaana re waru makuape.  
Gore aanu rayo madaa mo nimuna padane  
padane laatapu pemeana yoto ruma katea.

**26**

<sup>13</sup> Naa si nere epe redepi alumbi apaa nepe.  
Gore epe eta yapulu agaa-para rede ora waru  
palia.

<sup>14</sup> Gorupare neme waru makuaawa adape epe  
kone-para epe makuae yae lapore rede pi  
yae meda mua oro yalo pirali.  
Neme go yaenu mealiri epe-rupa pirua ne abi  
naomali.

**27**

<sup>15</sup> Ne wae aa yaliare neme kudiripu pirua epe aa  
medana ada-para nasuruba pirape.

Goa puare nipuna oyaenu paake napape.

<sup>16</sup> Gore epe redepone aa wae yaeme malopaaliare  
nipu oro yalo wala rekaa pitia.  
Go yapare wae pupitagi ne aanu lopalimirri  
nimu bebo teme.

**28**

**17** Nena iaa medame kedaa rialia rabu neme epe  
pia nalape.

Neme oyae meda madaa aa-kidipa pitaawa  
lopolalo paliare gore neme giri nalape.

**18** Gore akolo ya? Adaa Aa-me neme go palide-  
a adalia rabu mo iaa madaa pape ronore  
wala ne madaa pina tea-ga waru adape?

### **29**

**19** Neme mo waea pemea adoa kedaame na-  
omape.

Neme goa pali raburi nena kone mabebo-  
lalia. Goa pua mo palimide aanu madaa  
page kone kedaa nameape.

**20** Dia go aanu nimu epe yae meda mada na-  
adasalimi.

Nimu ora laba paa udinita-rupa mada  
aipapulu omalimi.

### **30**

**21** Gore na si nere ora Adaa Aa-na rolo-para page  
piru aa mudu king-na rolo-para page pawa  
pirape.

Go rabu wae aanu rol0-para napimi-pulu  
nimu raapu napirape.

**22** Go piaene onaare nimu wae yae reparap  
aipapulu mealia.

Adaa Aa-para aa mudu king lapo-me go pi-  
aene onaa-re ake piaene yoto katea palo  
niaa namakuaema.

### *Epe Agaa medaloma*

**23** Epe kone i aanu medalomame go agaa kiri-  
taawa isimi.

Gore aa medaloma koso talo peme rabu koso surube aame aa medaloma rabamua medaloma maoyata palimiri otaa.

<sup>24</sup> Waea pi aa koso mada adialimi pare mo koso pagoa rumae aame nипу na-adini pa penafea.

Goa palia raburi ada kagure-nini piri on-aame go koso pagoa-rumae aa nипу ero loa marakepeae agaa adaapu teme.

<sup>25</sup> Go yapare mo koso pagea aame waea pi aanu adialepape teare nипу eperupa pirua epe yaenu mealia.

<sup>26</sup> Epe redepone agaame abutea-daare go aare nena adami aa.

<sup>27</sup> Neme aba ripia maapu poa su maredepo yaa-woare orope gopare ada paina.

<sup>28</sup> Gore neme aa medana koso rabamua talo palidare neme pama pupitagi nane aa loa go aa narabameape.

<sup>29</sup> Go page pa aa meda madaa neme abia nipuna wae yae abutalo pi nalape.

Aba ni go aa-me waea pisa-da wala abutalo pi nalape.

<sup>30</sup> Ni pora pamua epe kone naiwae kiaa rakepene aa medana e maapu pa mu adawa.

<sup>31</sup> Go maapu ripu wae-para itutu medaloma page opea.

E-kepore aana-me pi yapare aba robapapepu lopisana.

- 32 Neme go maapu adoa kone adaapu mua ni  
makuae yae ora waru meawa.
- 33 Wae kiaa rakepene aame goa teme:  
Palainawa loa u ogeda pateme.  
Goa pua ki arota-para pagoa kiaa rakepea  
pimi.
- 34 Nimumi goa peme rabu oyae luabu aipapulu  
diayoa naraa onaa pirualimi.  
Go rabu nimuna oyae luabu paake ne aanumi  
mube nona palia.

## 25

*Solomon-na epe agaa medaloma. (Sapta 25-29)*

- <sup>1</sup> Gore Solomon-na agaa rudu rudu medaloma  
go ia.  
Hesikia mo Juda aanuna aa mudu pirisa rabu  
nipuna pipaa ti aanumi go pipaa tu isimi.
- <sup>2</sup> Adaa Aa-me oyae-yae luabu nipuna kone-para  
pagaa su pia. Goa pea nипу adaa bi katema.  
Goa pea pare aa mudu king-mi oyae luabu  
kudiripu ia-da nipumi adesaatalo kogono  
kalai adaapu pea. Go page niaame king-an  
bi minasaatalo pema.
- <sup>3</sup> Niaame king-na ia kone luabu mada na-ado  
kiritalima.  
Gore go-rupa madaa niaame oyae luabu so  
yaa-para ia page no ipa solowara runane  
ia yaenu page mada na-adema.
- <sup>4</sup> Aanumi aana silva irua ora ria mealimi.  
Goa pua ora epe pelete mada warialia.

- 5** Go-rupa agu waea peme aanu ratu rubalimi  
raburi nimu mo king raapu mada napiraal-  
imi.  
King-mi epea palia raburi mo ora epe ada  
kagure puri paloa aalia.
- 6** Ne mo aa mudu king raapu aalidare ni page aa  
adaa yade kone sua neme aakone naiawa  
aape.
- 7** Ne adaa aa piritalo palidare orope nipu ipua ne  
epa ratalia rabu wae-para pali.  
Goa palia-ga ne pa aa naraanu raapu pirua  
orope ne mo adaa aa-rupa pua pira teme  
rabu prita paina.
- 8** Neme waea paedelo aipapulu yaa agaa mari-  
aawa koso nalata pope.  
Gore aa medamene adoa makirae koso ne aa  
yade teare neme ake pali yapae?
- 9** Nena adami aa raapu yae meda madaa agaa  
talo pali-daare ne mo nipuna ada-para pua  
agaa maredepoya tapape.  
Pare neme agaa kudiripi meda aba pagaliri  
nalapedepeape.
- 10** Wala orope go agaa kudiripi lapedepeali rabu  
go aame agaa pame lapedepe ta teme rabu  
ne yala mapolalimi.  
Goa pua ne madaa oro yalo wae kone-su  
aalimi.
- 11** Go yapare aa medame agaa ora epe-rupa meda  
lapedepealia raburi go aa nipuna agaare

golome warini piksa-rupa madaa goa pua  
pepenare silpa-na pepena pae nona palia.

**12** Epe kone i aamere nipuna adami aa maredepo  
yaya.

Goa pua mo nipuna adami aame nipuna  
aa-na agaa epeta kone saliadare nipumi  
golome warini epe yae meata-rupa la.

**13** Go yapare agaa lama epaliade aame nipuna su-  
rube aame tea agaa redepona lama epalia-  
daare nipumi nimu raaname epe-rupa om-  
ena tea.

Gore aanumi nimuna maapu-para ipa ko-  
gaare nemed-e-rupa mada mealimi.

**14** Onaa medalomame oyae ode meda katema loa  
wala nakatemere yai naepe pa poripu-para  
moae epeade-rupa mada agaa teme.

**15** Gore neme agaa pawa kumupu loa nena agaa  
napagolalo pi onaame page wala pereke-  
tua raana omoa nena agaa mada pagalimi.

Goa pali rabu aa adaanu page nimuna kone  
mada perekealimi.

**16** Gore neme alubi apaa medaloma repena apaa-  
para ina adaliri nena etaa ne robo-para  
nape.

Neme ora adaapu nano kone sua adaapu nali  
raburi nena robaa rubia maaku ratali.

**17** Go page nena adami aa-na ada-para oro yalo  
napope.

Nena adami aame ne gime omalia.

18 Aa medame nipuna adami aa-para pa mariaa agaa teare etaa page rai page repename temede-rupa nipuna adami aa go tea.

19 Neme yaa agaa ne aa meda adalidare wae yapi di rabu ni rabamina kone salidare ne agaa odonalo pi aame eta neade nonapi aa yalia. Go page ke odonalo pi aame pora pameme-rupa mada yalia.

20 Neme aa medana lo robaa kedaa ina piru aalia rabu go aa rabamealua kone sua neme rupa-yasa te pare mo aa mada narabameali.  
Go piaene aa-re poripu epea rabu seti kolo rabua aipame rere madaa kiraawa pemेrupa mada yade.

21 Nena iaa meda reaeme omalia-daare eta kalape.  
Ipa nalame omalia page neme ora kalape.

22 Neme goa pali-daare nipuna pea wae yae mada yala mapolaeye goa pe-pulu Adaa Aa-me ne epea palia.

23 Po ripumi yai mea epeade-rupa mada maa agaa paeme koneme aa ratu mayawaawa ini agaa-para oke rita.

24 Aa medana pa konemere ada masaa piritu pea rabu nipuna onana wae ratu yawe kone page rabuaaya.

- <sup>25</sup> Aa medame epe agaa su adaalu-para mea epalia-daare go aa nипу ipa kogare noa lо-robа kumapu-rupa tea.
- <sup>26</sup> Wae aa medame epe-rupa piri aa epaa yolo bebolaalia-daare nipumi ipa karerene-para wala emaagu piade-rupa mada pea.
- <sup>27</sup> Gore aa meda alubi apaa adaapu no mamalia-dare naepealia.  
Aa medame nипу adaa bi kana kone sua kalaipu kogono pualia-dare naepeta.
- <sup>28</sup> Aa meda nипuna ratu yawea kone namina-baliare gore aa medame nипу rabunialia.  
Gopiane aare adarena pape yokapa ia-rupa mada aa yade.

## 26

- <sup>1</sup> Epe kone na-i aa meda adaa bi katare gore na-epe ta.  
Gore yai radaki raapu nare palu loapeade-rupa mada yade. Eta napeta rabu yai radaaki apaa lopea-rupa mada yade.
- <sup>2</sup> Aa medame pupitagi nanalia pare Gote-me go aa pa tina agaa tea-daare go agaana ini mada namadiaalia.  
Nimuna agaare yaanumi repena palaa madaa napiralia pare pa biyaa pamea-rupa mada yade.  
Goa pea-pulu ini namadini agaa teme.

- <sup>3</sup> Aanumi ose-mena aipapulu penalo aipuya  
unimi teme-rupa mada yade.  
Gore dogi-menana agaa-para aeyane-me  
pora epe-rupa ma-puaeme-rupa peme.  
Wae maeyae peme onaa goa napape loa  
teme-rupa mada yade.
- <sup>4</sup> Aa meda nipu epe redepone kone nasalia-daare  
nepara epe agaa meda natea. Goa palia-ga  
neme nipuna agaa na-abulape:  
Neme nipuna agaa abute raburi wala nipumi  
pea pali.
- <sup>5</sup> Epe kone nai aame ne-para wae agaa tea-daare  
nipuna agaa abulape.  
Na-abute raburi nipumi makua kone ora  
epeta kone salia.
- <sup>6</sup> Kone waru na-i aa meda-para go agaa laketa  
pu loa penatedare gore nena ne bipa ne  
maoyaayawa nena ke mea kepe rube nona  
palia.
- <sup>7</sup> Epe kone napiri aame epe agaa meda lano  
kone sua tea-daare mogo tea agaa epe-rupa  
mada natea.  
Go agaare ke wae aa-na pora pamea-rupa  
rado yade.
- <sup>8</sup> Epe kone nai aa meda aa mudu bi kateme-  
daare nipumi etaa madaa aana mapagaawa pitalo peme-rupa mada peme.

<sup>9</sup> Aa meda epe kone nasua nipumi epe agaa meda pa lano kone sua tea-daare ipa bia neme aanumi ope etolo etolo-ae kimi ripinuae nona-palia.

<sup>10</sup> Surube aame kone waru na-i aanu kogono katalo paliare onaa adaapu ae-para etaan mada pi moneaya.

<sup>11</sup> Kone waru na-i aamere nipuna abade maeyae-rupa wala maeyaaaya.

Go peare yana-me maaku ratu ruboa wala mea neade-rupa mada pea.

<sup>12</sup> Aa meda epe kone nasaliadare niaame nипу mada rabamua epe kone mogealima pae? Maria.

Pare go aa nipumi oyae luabu makuaayo kone salia-dare niaame go aa agaa mana loa rabameape-rupa mada dia.

<sup>13</sup> Kiaa rakepene aa nipuna adapara pa piruaawa nipumi gupa ta.

Mo pora mena layono aaya kone sua pala omoa napea.

<sup>14</sup> Kiaa rakepene aa nipumi nipuna ada runane patua pereke pereke tupia ada dua warini inisisi lego lego malaawa runane piruaaya.

<sup>15</sup> Kiaa rakepene aame eta aipapulu mea nolalo nipuna ki pelete madaa ia.

Goa pea pare nипу mo eta minasaawa agaa-  
para mea nepe-rupare puri na-ia.

**16** Kiaa rakepene aame epe kone i aa (7) kerepopu  
na kone rabuaayo kone ia.

Goa kone sua nипumi aakone waru ia.

**17** Gore aa laapome yada yada pua ratu yawalipi  
rabu aa medame nипу pua rabamealia-  
dare go aa nипу yana pupulaina aane pua  
ripinae nona pia pea.

**18-19** Aa medame nипuna adami aa makiratalo  
puare wala orope gupa tea.

Neme pa raapa agaa lawade ta.

Gore maeyae aame repena agaa lusu ruboa  
etaane rubebe mada pea.

**20** Repena kaapu repena ralae-para na-iralimi  
raburi gore repena naralia.

Go page aanumi maa agaa natemere go  
yaweme ratu dia yalia.

**21** Repena kaapu waru iritimi rabu repena ora  
waru reade.

Gorupare ada pi agaa ta aamere yada agaa  
ora ma-adaayaya.

**22** Niaame aa yago medana maa agaa pame rabu  
go agaa pagape madaare raname waru  
omema.

Go teme agaa-re epe ta kone sua epe eta-rupa  
mea neme.

- 23 Aa medame epe-rupa awape agaa puri paloa  
tea-daare ora yapare mo konena rere waea  
papena ta.  
Gore sumi warini sosopen-rupa yapare wala  
silipa golme warini nona mapaaeme.
- 24 Gore aa medame aa yaago meda raname na-  
omaliare pa agaame makirae kone sua  
nimu rana omana kone inalo pea.  
Nipu makinae kone sua pea.
- 25 Go piaene aanuna agaare nena aaneme pa-  
gape mada ora rede waru palia pare neme  
nipuna agaa madaa kone narulape.  
Gore akolo ya? Nipuna kone pu robaa-para  
wae kone luabu pa rubitabea.
- 26 Nipuna pu lo robaa-para ia wae kone raayo  
pagaa salia pare onaa luabumi nipuna wae  
kone adoa makualimi.
- 27 Aa medame nipuna bipa nипу wae yaenu pa  
pu aano kone sua paliare nipuna bipa nипу  
otaa. Gore aa medame koyati pa onaa  
awena kone sua ia pare wala nipuna bipa  
mo koyati patemedede-rupa mada pea.  
Gore aana agaare rudu madaa sone mea pea  
pare wala perene ipua nипу epa tea-rupa  
mada yade.
- 28 Aa medame aa yago meda yaa agaa medaloma  
laketea-daare nipumi yaa agaa loa onaa  
ma-oyape mada pea.  
Aa medame oro yalo omeme pi agaa teare  
gore aa yago ma-oyaatalo pea.

## 27

<sup>1</sup> Neme aakone sua ekeraa goa palua loa agaa meda narogaa sape.

Goa loa piraina abia paliare ne-daa namakuae.

<sup>2</sup> Gore aa medame nena bi minasaaliare ora epeta pare nena bipa nena bi naminasape.

<sup>3</sup> Maeyae aanuna kone epe-rupa naimi-pulu go imi koneme niaa kedaa adaa meda geme.  
Go epea kedaare ipa muna kedaa-para adaa aana lapome adea.

<sup>4</sup> Aa medaloma ratu yawoa wae pemenumi onaa yago kedaa adaapu pa mea kateme.

Goa pea pare oyae epame omoa kone wae imi konemere ratu yawoa aa meda-para wae kone imi kone luabu rabuaaya.

<sup>5</sup> Waea pi aa meda maredepo rabu ne yago-rupa raana ome kone page kalo aaye.

<sup>6</sup> Nena adami aanumi nimu raba meainalo radaa ora waru mea geme palo peme.

Pare mo nena yada-lore aanumi epea pua ne makira teme.

<sup>7</sup> Aa medame eta luabu noa pua nipuna robaa-para rubita raburi alubi apaa ora ota pare reame ome aame rero pi eta nea rabu ora mada nalia.

**8** Gore aa medame nipuna su ada gimoa pa pora  
pamu aaliare yaame nipuna piri-para gi-  
moa pa riyaa pamuaya-rupa mada pamea.

**9** Waele-sada page ora epe wabala waele luabu  
pema raburi niaa mada ora epe ta kone sua  
pedo waru pema.

Go page niaana adami aanumi niaa raana  
masaawa niaa rabameape kone imi epe  
agaa loa epea pemede-rupa mada yade.

**10** Nena ona nogo naakinu-para nena adami aanu  
masaa narilape.

Go page wae yae medame ne epaa mulalo  
paliare gore ne rabamina nena ame na-  
adola pope.

Aa meda ne raapu reparu pirali-daare go ame  
su adaalu-para aaya page rabuniaaya.

**11** Naa naaki neme epe kone luabu mua epe pora  
luabu ratali-dare ne madaa epe kone salua.

Goa pua aa medame nipara pa mariae agaa  
teadare neme nipuna agaa mada abutoa.

**12** Epe kone i aamere gore nipumi ora go-  
rupa makuaaya. Kedaa nипu mada epo-  
lalo palia-daare gore nipumi aipapulu ma-  
pakeaalia.

Goa pea pare epe kone na-i aare gore mo pora  
wae i-para pea rabu page go wae yaeme  
nipu ora mea rabu ora aipapulu kedaa mu  
aaya.

**13** Aa medame mo aa yagona rudu neme abulalua  
loa wala naabutea-daare gore nipa wea aa  
yade.

Go yapare mo nepara yaa agaa robali aame  
nepara rudu meda giaina tea rabu nipuna  
ta yaa agaa aba ade-ga neme mo rudu  
abuna kone sua oyae meda puri paboa  
meape.

**14** Gore neme rui puri pabo loa nena adami aa-  
para ribaa reko te-dare nipa-para wae agaa  
temede-rupa mada te.

**15** Aa medana ore agaa rado rado adaapu ne ona  
yaliare gore ada runane yai itipa-ta pogō  
pogō loatade-rupa mada pea.

**16** Goa pea-pulu nipuna aanimi go agaa kone  
luabu magimaape-rupa mada dia.

Goa peare aame poripu page wabala  
pepenini page ripinaalua kone sua  
pemedea-pea.

**17** Nimumi puri pane aeyane nepo papere wala  
aeyane yagome nepo pemē.

Go peme-rupare aa yago medame mo aa yago  
rabamua epe kone masaaya. **18** Aa medame  
repenana ini etalia rabu go repenana ini  
raloa nalua kone salia-dare go repena ora  
waru surubalia.

Aa medame nipuna surube aa ora waru  
surubalia-daare go surube aame mo aa  
nipuna bi ora waru minasaalia.

- 19** Aa medame mo ipa ini-para adainaalia raburi  
nipuna ini agaa nipuna bipa adea.  
Go-rupa aa medame nipuna pea rayo waru  
adoa rumaliare nippu gopiane aa yadelo  
makualia.
- 20** Gore aa adaapu omalimi page pinawa. Mo aa  
tapa luabu mada narulatabalia.  
Go-rupa mada nipuna kone-para ia yae luabu  
mada napu kiritalia.
- 21** Repena sulaame silipa golonu roa rakepeta.  
Go rupa mada go aa-re epe aa yade wae aa  
yade lo aba ademe.  
Epe aa yaliare nipuna bi minasaeme.
- 22** Gore neme epe kone nai aa puri palo tali-dare  
omolalo palia-rabu nipuna maeyae kone  
mada nagimalia.
- 23** Goa palia-ga nena mena sipsip-para meme  
mena luabu waru surubape.
- 24** Gore akolo ya? Nena mone-re ne raapu oro yalo  
mada nasapiti.  
Mo aa mudu pia king-na ruru page oroyaloo  
mada napitimi.
- 25** Nena maapu-para ripu adaalu opalia-dare  
ponoa nena menanu nena mea sape.  
Goa pali rabu wala ripu kagaa opalia.
- 26** Goa pua orope nena meme mena mada yoto  
mua su kabaina.  
Goa pua mo sipisipi mena iri pudi mua  
marape yae wariaina.

**27** Goa puare nena mo meme mena adu ipaa muare nena nogo naaki ona raapu nape ipaa meaina.

Goa puare nena kagono onanu page mada kate.

## 28

**1** Waea pi aanuri pama paala omo nimu pagola peme.

Goa peme pare epe kone i aanuri mena laiyano aaya-rupa puri aaeme.

**2** Kantri meda-para piri onaame nimuna gav-man senisi pulalo yada palimi rabu kagaa alopape aa mudu rado re-para alopatalo peme.

Go yapare aa mudu epeme surubolalo paliare ada kantri epe-rupa pa aalia.

**3** Aa medame naraame ome aanu rabuniaatalo palia-dare gore yai adaa ipua e maapu marateade-rupa mada pea.

**4** Rekena i agaa rasitemere wae yae peme aanuna bi minasaeme.

Rekena agaa ratua pimi aanumiri waea peme aanu rabuaniaaeme.

**5** Waea peme aanumiri epe porare ake piaene yapalo nimu ora na-ademe.

Goa peme pare aa medaloma Adaa Aa ratu-lalo peme onaare epe pora ademe.

**6** Aa meda nипу oyae dia yaliare epe aa yaliare amo ne aame pea luabu rabuaaya.

<sup>7</sup> Ogege-aame rekena i yaenu luabu ratua paliadare epe kone ia.

Pupitagi noa yada yada pi aanu raapu aalia-daare nipuna agi aaraanu yala polo pitimi.

<sup>8</sup> Aa medame mone rudu minaloa onaa repara poropete adaapu waria mealia pare mada nasaalia.

Dia, pare araanu rabameme aana kinane paliia.

<sup>9</sup> Aa medame rekena i agaa narataliadare Gote-me go aana beten napagalia.

Gote-me go betene pageare pugu waru pugu pea-pulu mada napagalia.

<sup>10</sup> Aa medame epe aa meda makiraatalo paliare nipuna paliade waeame nipi wala mapiraalia.

Go yapare aa meda nipi wae yae napi pawa aaliade-daare Gote-me go aa nipi epe epe yaenu mada katea.

<sup>11</sup> Oyae adaapu i aanu nimu ora makuae yae ima kone imi pare naraanu kone waru sua amope aanuna kone makuaaeme.

<sup>12</sup> Epe redepone aanumi nimuna kantri surubolalo peme raburi onaa luabumi go aa madaa ranaame waru omeme.

Wae aanumi mo kantri surubeme raburi onaame palaa omoa nipi kaledeme.

- 13 Aa medame nipuna wae yae pawa kudiripu pa  
     ina kone sua piraliare go aame epea napea.  
     Go yapare aa medame nipuna wae-yae lu-  
     abu lapedepealia-dare Gote-me go aa nипу  
     odome omoa raba mealia.
- 14 Gore aa medame Adaa Aa madaa kone rulaawa  
     piraliare nипу raana waru omoa pirina.  
     Go yapare nipumi Adaa Aa-na agaa rasua  
     waeau pu piraliare nipumi waea kedaa  
     mu-aalia.
- 15 Gore kantri surube aame waea pua naaranu  
     rabuaniatalo paliare nипу ota.  
     Gore mo mena laion nipumi e-adaa puri palo  
     ta-rupa para mena beame eta asapea-rupa  
     mada ta.
- 16 Gore mo kantri-na surube aa nипу epe kone  
     na-i yaliare onaa luabu pa rabua tua ma-  
     oyatalia.  
     Go yapare adare surube aame onaa luabuna  
     oyae nayotea pare ma-oyaape madaa gime  
     omaliare nипу adaalupu epe-rupa pa pi-  
     ralia.
- 17 Aa medame aa yago tumaomaliala-dare go aa  
     nipuna tapa poaawa kedaa mealia.  
     Goa pua nипу ora epe-rupa napiri omalia.
- 18 Gore aa medame epe kone epe pora ratua  
     aaliare nипу epe reddepoya piruaalia.  
     Pare waenupu aalia aare aipapulu oyo tua  
     alupalia.

**19** E-poae aa yaliare nipuna maapu-para eta ora adaapu su aalia.

Kogono radore waru na-i mada pama to tu ruboa pu aaliare nipu wae-rupa naraa pirualia.

**20** Aa medame redeponea rataliare Gote-me go aa nipu epea palia.

Aa meda nipu mone adaapu aipapulu sano kone saliare Adaa Aa-me go amope nipu epena kone na-ia. Dia mo amope aa nipu kedaa waru katea.

**21** Na-epeta koso madaa aa meda rabamua aa meda wala malopaliare gore ora na-epet ta.

Goa pea pare aa medaloma waeanu pulalo managola pimi pare mo nimu omeme pua rabameape mone ogesi kateme rabu eperupa giala kone na-imu.

**22** Aa meda nipuna yaenu o waru yoa aalia-daare aipapulu amope alia.

Pare nipu orope aa naraa piralua kone naia.

**23** Gore neme aa meda maredepoyali nipumi ranaame waru omalia.

Go palipide-a luabumi mo omeme kone luhu abu rabuaniaaya.

**24** Gore aa medame agi araana oyaenu paake noa gupa ta.

Neme go oyaenu nameawa ta.

Paake nameawa ta agaare gupa aa medalomame oyaenu ma-oyaame-rupa mada yade.

- <sup>25</sup> Aa meda nипу oyae yoloa salua kone saliare aa adapumi go madaa ratu yawalimi.  
Go yapare aa medame Adaa Aa madaa kone rulaliadare go aa nipumi epe-rupa pirua oyae adaapupe salia.

- <sup>26</sup> Aame nina makuae oyaeme nipuna bipa madaa raba mealia kone ia pare mada dia.  
Go yapare aa medame epe redepone kone ratu aliare go aa nипу epe-rupa piralia.

- <sup>27</sup> Aa medame aa naraanu oyae pa ode kateare go aa nипу oyae mada narudutea.  
Go yapare aa medame mo naraa onaa adoa oyaenu naruma kateare aa nипу ota teme.

- <sup>28</sup> Wae agaa lo wae pora rati aanumi kantri surubalimi-dare onaa nimu kalodoa piralimi.  
Pare go wae aa mudunu omalimi raburi epe kone su epe pora rateme onaa nimu epe-rupa pirua surubeme.

## 29

- <sup>1</sup> Gore aa meda maredepo yatalo palimi pare nипу wala pa pala pitia raburi gore nипу ora aipapulu raba meape pora nasalia.

- <sup>2</sup> Epe redepone aa mudumi kantri surubeme raburi onaa luabumi raaname omeme.  
Goa peme pare wae aanumi kantri surubeme raburi onaa luabuna lo robaa-para kedaa rua re teme.
- <sup>3</sup> Aa medame epe kone mulalo palia-daare nipuna aapa aba epe kone masaalia.  
Go yapare aa meda nipa ona pake nama palia raburi nipuna mone oyaenu gopara pua rubea.
- <sup>4</sup> King-mi mo kantri epe-rupa surubaliare go kantri epe-rupa pa alia.  
Aa mudu king nipumi onaa luabuna mone oyaenu luabu nipa gina kone sua surubalia-dare kantri maoyaalia.
- <sup>5</sup> Aa medame nipuna adami aa omeme pi agaa tea-dare nipuna bipa nipa raape kona maya.
- <sup>6</sup> Gore aa medame ni oyae pa gina kone salia-daare nipuna bipa nipa roape kona maaya.  
Go yapare aa medaloma epea peme aanu nimu raana raapu aawa yasa lo aalimi.
- <sup>7</sup> Epe redepone aanumi mo aa naaranuna kedaa ritimi adoa go madaa kone waru sua raba mu aaeme.  
Epe yae wae yae lo waea peme onaame re ora waru namakuaawa pa puaeme.

**8** Paake pupitagi ne aanumi mo taun-para piri onaa waea peme rabu lo robaa-para radaa mapaaeme.

Goa peme rabu mo epe kone redepoya imi aanumi nimu epe kone kateme rabu nimu lo robaa kuma mua epe-rupa pimi.

**9** Gore epe kone i aame aa meda kone wae i aa koso latalo palia-daare go aa nipu ora epe kone naia.

Go aa nipuri pa ratu yawe kone agu sua nipumi wae agaa loa wae pora pamuape kone padane ia.

**10** Aa yagonu tumaomaeme aanumiri epe redepoya pimi aanu adoa rana na omeme.

Go yapare mo epe redepoya pimi aanumi nimuna epe-rupa redepoya pimi aanu epe-rupa pirina kone imi.

**11** Kone redepone na-imi aanu nimuna ratu yawe kone sua agaa teme rabu pename ta.

Go yapare epe kone imi aanumiri nimuna ratu yawe kone pa nimuna lo robaa-para ina nalapedepene gimeme.

**12** Yaa agaa ne aanumi mo kantri surube aa muduna kogono paliare mo yaa agaa ne aanu kantri-na ofisa kogono go wae aa luabumi palimi.

**13** Aa adaame onaa luabu ini maria aya nimumi oyae adenalo pea.

Adaa Aa nipumi mo naraa aanu page kaloa  
nimu rabuniaaae aa medaloma page kata.

<sup>14</sup> Gore aa mudu king piraliade aame aa naraa-nuna epe redepone koso pagalia-dare oro yalo go ruruna king pa piruaalia.

<sup>15</sup> Neme nena nogo naaki tua epe mana te-daare  
nipumi epe kone mua epe makuae yae  
page mealia.

Go yapare nogo naakimi oro yalo nipuna  
raana ratua aaliare nimuna agira yala polo  
ma-pitia.

<sup>16</sup> Waea pi aanumi kantri surubalimi rabu mo  
palimide wae yaenu ora adaa yalia.

Go palimi rabu kantri surubalimi aanu nimu  
adaalupu napiralimi gore redepone aanumi  
adalimi gore ora peboteme.

<sup>17</sup> Gore neme nena naaki epe agaa lakeloa pirali  
rabu nipumi nena agaa pagoa epe-rupa  
pitia-dare epe kone sua pirali.

<sup>18</sup> Adaa Aa-me onaa epe agaa nakata pisa yalore  
nimu kone rado rado sua pirita peme.

Go yapare aame Gote-na agaa ratua piralimiri  
raana raapu piralia.

<sup>19</sup> Go yapare nena kogono aa-para agu agaa te-dare  
neme nippu mada nama epeali.

Pinawa neme agaa lakete pare nena agaa  
mada naratalia.

**20** Aa meda nipu epe redepone kone nasaliare gore nipu epe kone minalo maredede yamina palo adamina.

Go yapare aa meda epe agaa naloa pa mabebola teare gore wala maredepo yalape-rupa maralia.

**21** Nena kogono naaki ogesi rabu nipuna kone meape yae kalamama pua yali-daare oropere aa nona palia rabu nena oyae rayo mealia.

**22** Ratu ora aipapulu yawe aamere onaa aa radonu page ratu mayawaya.

Goa pua mo ratu yawe aa nipu wae yae adaapu pea.

**23** Aa medame nipu ora aa ayo loa nipuna aako tua bi minasaliare nipuna bi mada rabuanialimi.

Aa medame nipuna bi rabuniaawa aliare orope go aa nipu adaa bi mealia.

**24** Aa medame paake ne aa rabamealiare go aa nipu page paake ne aa nona palia. Go paliade yae amaa mea salia raburi nipu koso loa mada adialimi.

Go yapare nipumi paga saliare Gote-me nipu ma-oyalia.

**25** Aa medame aa yagonu pala omaliare go pala re ena agona-para nipu pua piri nona pea.

Go yapare aa medame Adaa Aa mada kone  
rulaliare nипу ере-рупа mada piralia.

<sup>26</sup> Aa adaapumi kantri rupara aa mudu pimi aanu  
omeme pulalo pemere nimu raana omena  
lo peme.

Goa peme pare Adaa Aa-me niaana kone  
adoa niaana pemanu ora epe-rupa ru-  
maawa niaa rabamea.

<sup>27</sup> Epe kone rulae aanumi waea peme aanuna  
kone adoa raana na-omeme.

Go yapare mo waea peme aanumi epe pora  
rateme aanu adape page raana na-omeme.

## 30

### *Agu-na Epe Agaa Medaloma (Sapta 30-31)*

<sup>1</sup> Go agaare Jakina si Agu-me Itele-para Ukal page  
lakesimi agaa remaa yade.

<sup>2</sup> Agu-me Gote ni raapu an pirua niri aa-da dia  
yade sa.

Goa loa niri kone-daa waru na-isa.  
Nina konere ora wae sa.

<sup>3</sup> Ni epe kone nasu ora ni oto pare Gote nипу ora  
epe redepone aa yade.

Pare neme nипу na-aде.

<sup>4</sup> So yaa-para aapi pua su-amaa wala ipisa pae?  
Go page po-ripu aapina kimi ripinaa misa  
pae?

Go page so moae madaa aapimi ipa mapiraasa?  
Goa pua laplap mada oyae sua aapimi kea-  
punisa?

Abia go ia su luabu apimi puri mapalaawa robo  
ma-sasa?

Nipuna biri aapiya?  
Nipuna si-ri aapi ya?  
Go yaenuri nere makuae pae?

<sup>5</sup> Oyae luaburi Gote nipuna saa rabu opesa. Gote-na Agaare ora ria yade.

Goa pua nипу piri peme onaare nipumi ke-popu runane yawa surubea. Gore mo etane epa aalialo ralubi maditema-rupa mada nipuna agaa-me niaa rigitaniaawa.

<sup>6</sup> Nena agaa meda loare gore Gote-na agaa yade pi nalape.

Gote-me orope ne koso lalia rabu go aa-re waea pi aa yade teme.

<sup>7-8</sup> Gote nere oyae laapo agaa mulalo pi-ga neme go yae lapo giaina.

Oro yalo ni go su-amaa pirualua raburi yaa agaa-para makirae kone luabu gimanowa.

Neme niri amope-para aa naraa page namapirainalo-pi.

Dia nina nape eta robo-para giape.

<sup>9</sup> Neme oyae ora adaapu salua rabu ne masaa rilawa.

Adaa Aa-nere aapi yapae toa?

Ni naraa piralua raburi neme paake pupitagi noa waenu pualua rabu nina Gote Adaa nena bi ma-oyaluada go aaene lalo.

<sup>10</sup> Neme surube aa piri pua kogono naakina bi napua ma-oyaape.

Nipuna kogono aana bi ma-oyaali rabu Gote lorapalia rabu nipuna Gote-me ne talialo lalo.

**11** Onaa medalome goa teme:

Gote-me nimina ama aapanu ma-bebolatina teme.

**12-13** Onaa madalomame nimu waea meda napema teme pare nimu amulu papubaaya-pulu Gote-na ini agaa madaa nimuna pupitagi wae ia-daa adea.

Onaa medalomame nimu ora epe ta kone sua pa onaa meda otaa kone imi.

**14** Onaa medalomame naraa onaanu-para waea agu pulalo peme.

Gore nimuna agaa abulu-para rai napi eke aae ayaa-pulu nimumi mo naraa onaana oya mulalo peme.

**15** Yaapi nea paakana ogé nogo laapo pia.

Nipuna biri gupa teme: Ni gi ni gi teme.

Oyae maala-me nimuna raana mada na-pora poalia.

**16** Pandanere aba ome aanuna tapa-para aeme.

Laapore ore aani raapu patea pare naaki padaa napia.

Reporé sumi ipa adaapu mea pare ipa waru name.

Maalare kone ia repena sulaame oyae luabu rea pare naare nóna pea.

Go yaere ora luabu madaa naniminaata.

- 17 Gore aa medame orena ama page aaraa lapona  
     agaa rasini omalia rabu go lapome nипу<sup>1</sup>  
     mada narogaalipi.  
     Go rabu yaa itaa-para yaa aroka roka ipua ini  
     epa rasu nabalipi.
- 18 Oyae ipa maala ora rado pi aaene yae yapulu  
     neme ora mada na-makuaato.
- 19 Pandanere yaa ita nипу so yaa madaa awaya.  
     Laapore paakare nипу aana madaa pamea.  
     Repore ipa sipi-ri adaa ipa solowara madaa  
     pameade.  
     Maalare aa-me ona raname omemedede-rupa  
     pipi.
- 20 Oname nипуна aa gimoa rado raapu patia  
     raburi nипуми ipa mea radepe rubua goa  
     ta.  
     Neme yae meda napawade ta.
- 21 Go su-amaare yae maala wae kone ia-pulu  
     go sumi go kone adoa gime waru omea  
     pururu ora waru omea.
- 22 Go pemearе go-rupa:  
     Kogono naaki naara yapare wala king ko-  
     gono pea.  
     Aa medame kone nasua eta ora adaapu nea.
- 23 Ona meda nипу aa nape pa piruaawa aba ripia  
     aame gime ona yapare orope rumaeme.  
     Ona nипуна surube onana kogono nипуми  
     mulalo oyo moyo ari piralipi.
- 24 Go su-amaa yae maala raa-para pia pare  
     nimuna kone ora epeta:

- 25 Raguta puri na-ia pare eta dia yalia rabu nape  
eta waru amupu imi.
- 26 Yapa wamea page aana-para pimi pare nimu  
puri na-ia.  
Goa peme pare nimuna adare aana rulalo  
peme.
- 27 Oboro nipuna aa muduri napia pare nimu uliri  
pua pameme.
- 28 Oge kaau niaame kimi ripinaawa mealimare  
ora yapare nimu aa mudu king-na adapara  
pimi.
- 29 Oyae malare padane-para wata tina pameme:
- 30 Kira mena me puri pabea-pulu pa kira anune  
yaenu medaloma rabuaaya.  
Nimu pora pameme raburi oyae meda  
madaa paala meme.
- 31 Yaa kuta kosapeame nipuna aalu musaawa  
pora pameā.  
Lione mena ora aari oyae meda madaa  
palame naomoa pare ora nipuna puri rado  
aaya.  
Meme mena yadaapunu page king medame  
nimu mada natalimi.
- 32 Gore neme maeyae kone sua waeau pulalo  
paliri nena bi naminaasape pare agaa gi-  
moa yalame omape.
- 33 Gore neme mena gawana adu mua mea pereke  
pereke te rabu bata mada autea.  
Aa medana ini kadu mataliri ratu yawalia.  
Gore yada rekalia.

# 31

*King Lemuel-na agaa*

- <sup>1</sup> Go agaa-re King Lemuel-na agaa. Agime agaa mana loa epe kone minalo lakesa.
- <sup>2</sup> Nina naaki nere nina madiawa-pulu neme ne raaname waru ome.  
Neme Gote agaa misu rabu ni gisa-da madisu.  
Neme ake lano ya?
- <sup>3</sup> Neme ona meda nayoloa money page nakaloa nena puri dia yalia.  
Gore akoloya king-nu ma-oyaeme-daa go agaa lagialo.
- <sup>4</sup> Lemuel-yo king nimi ipa waini na-nape.  
Nimumi bia nape kone nasalepape.
- <sup>5</sup> Gore nimimi ipa agu nalimi raburi rekana agaa ruguloa mo aa naraanu-para epea meda mada napalimi.
- <sup>6</sup> Pa bia-para waene lapo-re omape onaa-para kedaa adaapu rini onaana nape eta yade.
- <sup>7</sup> Go piane onaare ipa nalame omalimiri pa nal-imina.  
Yapare nimu naraa pimi onaa oyae rudu yoa kedaa riapere kone rugulaawa nalimina.
- <sup>8</sup> Kedaa madaa nariape kepele pi onaare rabameape agaa lape.  
Goa pua mo naraanumi koso teme rabu raba meape-na puri waru pabape.
- <sup>9</sup> Neme koso te rabu mogo onaanu epe-rupa redepoya pagape.  
Goa pua neme mo naaranu raba mua su-rubape.

*Redepone ona-na pea*

- 10 Go yapare aame ona epe kone-i rumaatalo pe?  
     Ora yapare kalai pua asa palia. Go piaene  
     ona-na yotore gol-na yoto pea-rupa mada  
     yade.
- 11 Go piaene ona nipuna aanimi mo onana pea  
     luabu epea peada aba adea.  
     Goa pea-pulu ona-me nipi raba mealia rabu  
     mo aa nipi oyae ora adaapu salia.
- 12 Go ona-me aani-para oro yalo epea agu pea.
- 13 Nipumi laplap wariape ope adaapu page pusua  
     laplap adaapu wari pea.
- 14 Nimu luabumi eta ora adaapu waru imi.  
     Gore akolo-ya? Go oname eta ora su adaalu-  
     para mea epea.  
     Gore mo adaa sipi-numi eta madita pemedede-  
     rupa mada mea epea. <sup>15</sup> Epe onamere yapi  
     abi nane aina eta nipuna onaa raapu napé  
     aba yawea.  
     Goa puare nipuna kogono onana pape ko-  
     gono robo su kata.
- 16 Mo puri pane oname su kabolalore su ora waru  
     adoa kabea.  
     Goa pua orope mone muare repena waene  
     maapu kaboa poaaya.
- 17 Nipu oro meda gime naomea oro yalo puri  
     paloa kogono puaaya.
- 18 Nipuna labana wiki ora waele waru rubia  
     epeta rabu laba waru roaaya.  
     Go laba roaina ribaa ruma rumane nipuna  
     pea bisinisi raayo pua epe ta-daa adea.

- 19 Go piaaene oname ope waria nipuna bipa laplap rabuta.
- 20 Gore nipumi mo naraa onaa adoa oyaenu rudu teme rabulu kata.
- 21 Gore yai radaki adaa lopea rabu page nipuna aani nogo naaki yada dia kone ia.  
Gore akolo ya? Nipumi mo laplap ora epe pepena pi yae rabuta-pulu yada dia kone ia.
- 22 Goa pua nipuna ada-para sape balaket oyae page nipuna bipa rabuta-pulu nimuna ada-para epeta.  
Goa pua laplap kane-para yakopi lapo rata mua nipuna yamape oyae warita.
- 23 Gore mo adare-para piri aa mudunumi nипу adaa bi kateme.  
Nipuna aani page mo aa mudu meda yapulu goa peme.
- 24 Oro yalo mo oname epe mamina waria aako lete page waru warita.  
Goa pea-pulu mo bisinisi peme onaame epa kabeme.
- 25 Nipuna mogo pea kogono madaa mo ona ora epeta kone sua mo ona kone mapiraawa go pianе ona yade teme.  
Go orope epaliade yaere nипу palame naomea.
- 26 Nipumi onaa kogono mogeatalo palia-dare pawasi agaa loa pea.  
Nipuna ta agaa luaburi epe kone-para makuae yae lapo ora waru rubita.
- 27 Nipuna ada-para oyaе surubolalo palia raburi gime na-omea.  
Goa pua epe puri pane kogono pea.

- 28 Ora epeta ora epeta gore niaana ama teme. Mo  
ona nipuna nogo naakimi goa teme.  
Nipuna animi ona-na bi ora waru mi-  
nasaawa goa ta.
- 29 Niaana taun-para page niana oge adarenu-nini  
page go piane ona adaapu pimi:  
Pare neme go ona luabu rabuaye teme.
- 30 Ona padaneme niaa epe rede pi agaa lagialia  
pare nipuna peare rado piane.  
Ona ora epe yalia page pinawa. Nipu oro  
yalo gorupa mada napitia. Goa pea-ga  
niaame Adaa Aa-na rolo-para pia onana bi  
minasamina.
- 31 Niame ona nipuna epe kogono adoa nipuna epe  
kone page rumawa nipuna bi minasaeme.

**Gotena Epe Agaa  
Portions of Genesis, Ruth, Proverbs, Ecclesiastes, and  
The New Testament in the West Kewa Language of  
Papua New Guinea  
Sampela hap Buk Baibel long tokples West Kewa long  
Niugini**

copyright © 2003 The Bible Society of Papua New Guinea in cooperation  
with Wycliffe Bible Translators, Inc.

Language: West Kewa

Translation by: Wycliffe Bible Translators

First edition © 1973 The Bible Society in Australia

This translation is made available to you under the terms of the Creative  
Commons Attribution-Noncommercial-No Derivatives license 4.0.

You may share and redistribute this Bible translation or extracts from it  
in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are  
licensed just for use with those Scriptures and documents. For other uses,  
please contact the respective copyright owners.

2012-10-23

---

PDF generated using Haiola and XeLaTeX on 11 Nov 2022 from source files  
dated 9 Oct 2020  
faa531d0-f958-545a-ad6f-3ea7c18ff313